

Choaiq Thõ Phau-lô Chĩc Yõn Cũai Tâng Vil Rô-ma Santoiq Atõng

Phau-lô chĩc choaiq thõ nâi cõiq yõn cũai sa-âm õt tâng vil Rô-ma. An chĩc choaiq thõ nâi sám 57 toáq 58 cumo ntun Yê-su canõt. Phau-lô pai án yoc ẽ táq ranáq Yiang Sursĩ tâng vil Rô-ma; vót ki án yoc ẽ põq atõng parnai Yiang Sursĩ chu cruang Sapên hõ.

Dâu lứq Phau-lô chĩc bĩq dõq carbán alóí; moâm ki án atõng máh cũai sa-âm tâng vil Rô-ma dáng án câu níc yõn alóí. Cóp án atõng cũai I-sarel cõp cũai tở cõn cũai I-sarel dáng cóq alóí cõt ratoí loah cõp Yiang Sursĩ nhõ tẽ Yê-su Crĩt, cõ tian dũ náq cũai õt yõng tẽ Yiang Sursĩ cóp táq sũl ốc lỏih nheq. Phẽp rit I-sarel tở tẽq chuai amoong cũai.

Thõ nâi Phau-lô chĩc dõq catoaih máh cũai sa-âm cóq táq nõq yõn cõt tanoang o choâng moat Yiang Sursĩ. Tâng thõ nâi Phau-lô atõng samoát lứq la dũ náq cũai tẽq õt tanoang o yáng moat Yiang Sursĩ õng nhõ alóí sa-âm Yê-su Crĩt sâng. Cóp cũai tẽq bữn tamoong tamái la nhõ tẽ õt ratoí cóp Yê-su. Raviei Yiang Sursĩ chuai cóp ayõng cũai sa-âm yõn tẽq alóí bữn ốc ien khẽ cóp ốc bũi hõr tâng dõĩ tamoong alóí.

¹ Cúq la Phau-lô chĩ choaiq thõ nâi coi q sa-óh anhia. Cúq la cũai táq ranáq yõn Yê-su Crĩt. Yiang Sursĩ toáp ruroh cúq táq ranáq ayũng atĩ Yê-su cốp arô cúq yõn atõng parnai o tẽ án. ² Tẽ mbốq Yiang Sursĩ ữq yõn parnai o nâi na cũai tang bỗq án chĩc ốc nâi tâng Tâm Saráq Yiang Sursĩ. ³ Parnai o nâi atõng tẽ Con Yiang Sursĩ. Con Yiang Sursĩ cõt machõng con cũai tê tâng cutẽq nâi. Án lứq toáq tẽ tống toiq puo Davĩt. ⁴ Vót Con Yiang Sursĩ cuchĩt, án tamoong loah cõ nhơ Raviei Yiang Sursĩ bữn chớc toár lứq. Ngkĩq noau dáng samoát samơi án la lứq Con Yiang Sursĩ. Con Yiang Sursĩ nâi la Yê-su Crĩt, Ncháu hái. ⁵ Nhơ án, Yiang Sursĩ chuai miat cúq, cốp yõn cúq bữn táq ranáq ayũng atĩ án yõn cũai dũ cruang sa-âm cốp trĩh án. ⁶ Anhia la tốp ki tê, yuaq Yiang Sursĩ đốq anhia la tốp sa-âm Yê-su Crĩt. ⁷ Ngkĩq cúq chĩc choaiq nâi coi q sa-óh anhia tâng vil Rô-ma. Yiang Sursĩ ayooq lứq anhia. Án đốq anhia la tốp sa-âm án. Cúq sếq Yiang Sursĩ, Mpoaq hái, cốp Yê-su Crĩt, Ncháu hái, chuai anhia, yõn anhia ốt bán sũan ien khẽ níc.

Phau-lô Yoc Ê Sa-óh Vil Rô-ma

⁸ Dâu lứq, cúq sa-õn Yiang Sursĩ cúq sang, nhơ Yê-su Crĩt, cõ anhia khoiq sa-âm. Mách santoiq atõng tẽ anhia sa-âm khoiq parhan tâng dũ cruang. ⁹ Yiang Sursĩ khoiq dáng chơ máh parnai cúq câu níc yõn anhia. Cúq táq ranáq yõn Yiang Sursĩ, cốp cúq atõng parnai o tẽ Con án nheq

rangúh rahõ cúq. ¹⁰ Cúq câu sêq níc tẽ Yiang Sursĩ yoc ẽ pởq sa-óh anhia. Khãn Yiang Sursĩ yõn, tở bữn dũn noâng cúq lứq pởq chu nỏq anhia õt. ¹¹ Cúq ẽr áiq lứq yoc ẽ ramóh anhia, yuaq cúq yoc atởng anhia tẽ ngê Yiang Sursĩ khoiq yõn cúq dáng, dỏq anhia têq sa-âm pacái hõn ẽn. ¹² Táq ngkíq, hái manoaq chuai manoaq. Cúq atởng chuai anhia, cớp anhia atởng chuai cúq. Ngkíq hái sa-âm pacái lứq ẽn. ¹³ Sẽm ai ơi! Cúq yoc anhia dáng cúq chanchỏm ẽ toáq pở anhia sa-ữi trỏ chơ, ma cúq tở yũah bữn pởq. Cúq yoc lứq máh ranáq cúq táq yõn cõt palai tâng tộp anhia, machỏng cớp cũai canỏh tê, alới ca tở cõn cũai I-sarel. ¹⁴ Cúq tu dũ náq cũai ca cúq tở yũah atởng parnai o tẽ Yiang Sursĩ. Cỏq cúq atởng máh cũai Créc cớp máh cũai tở cõn cũai Créc. Cỏq cúq atởng máh cũai rangoaiq cớp máh cũai sacũl. ¹⁵ Yuaq ngkíq, cúq ẽr áiq lứq yoc atởng parnai o tẽ Yiang Sursĩ yõn anhia õt tâng vil Rô-ma tê.

Yiang Sursĩ Chuai Amoong Hái Cỗ Nhơ Hái Sa-âm

¹⁶ Cúq tở bữn casiet táq ntrứu atởng parnai o tẽ Yê-su Crít, yuaq Yiang Sursĩ bữn chỏc chuai amoong cũai cỗ nhơ parnai ki. Cũai aléq ma sa-âm samoát samoi parnai ki, lứq Yiang Sursĩ chuai amoong cũai ki. Dâu lứq Yiang Sursĩ chuai amoong cũai tẽ tộp I-sarel. Ntun ẽn, án chuai amoong cũai tở cõn cũai I-sarel hỡ. ¹⁷ Parnai o nãi atởng hái ốc ntrứu hái táq yoc ẽ õt tanoang

o yáng moat Yiang Sursĩ. Khân hái yoc ẽ õt tanoang o yáng moat Yiang Sursĩ, hái cóq sa-âm. Moâm ki hái sa-âm pacái lứq ễn. Tâng tâm saráq Yiang Sursĩ tẽ mbốq noau khoiḡ chĩc chơ neḡ:
 “Máh cūai tanoang o, lứq alóí bữn tamoong,
 cõ nhơ alóí sa-âm Yiang Sursĩ samoât samoi.”☆

Dũ Náq Cūai Bữn Lôih

¹⁸ Yiang Sursĩ õt tâng paloõng. Án sâng ũan lứq chóq cūai bữn lôih cóp táq níc ranáq sâuq. Máh cūai ki pupât chíq ọc pĩeiḡ cõ tian alóí táq níc ranáq tở o. ¹⁹ Tở cõn alóí tở bữn dáng ọc pĩeiḡ tẽ Yiang Sursĩ. Yuaq Yiang Sursĩ khoiḡ apáh chơ ọc ki yõn alóí. ²⁰ Moat cūai lứq tở têq hữm Yiang Sursĩ tở la chóc án. Ma têq alóí hữm máh ramứh án khoiḡ tẽng. Ngkíq alóí têq dáng raloaih ống Yiang Sursĩ toáp bữn chóc toâr clũĩ nheḡ tẽ canõh, noap tẽ tangái án tẽng paloõng cutẽḡ toau toâq sanua. Cóp alóí tở têq suon pai alóí tở dáng ntróu tẽ Yiang Sursĩ. ²¹ Lứq alóí khoiḡ dáng tê Yiang Sursĩ, ma alóí tở bữn noap án la Yiang Sursĩ. Cóp alóí tở bữn sa-õn án. Ma alóí chanchóm níc tẽ ọc tở bữn cõt kia ntróu. Ngkíq mút sacũl alóí cõt sacũl lứq ễn. ²² Alóí pai alóí la rangoaiḡ, ma lứq samoât alóí sacũl lứq. ²³ Yiang Sursĩ tở nai pút. Ma noâng alóí tở ẽḡ sang án. Alóí yoc ẽ sang rup cūai, rup chóm, rup cusân, cóp rup charán canõh hữ. Ma máh ramứh ki lứq cuchĩt.

☆ **1:17** 1:17 Ha-bacúc 2:4

²⁴ Ngkíq Yiang Sursĩ calõih alóí, cốp yõn alóí táq ranáq sâuq puai mút alóí yoc. Ngkíq alóí táq ọc sâuq salẽh lúq manoaq táq tở o chók tở manoaq. ²⁵ Alóí táh chíq ọc p̃ieiq tẽ Yiang Sursĩ; chơ alóí yõng ọc tở p̃ieiq ẽn. Alóí sa-âm cốp sang cớng Yiang Sursĩ tẽng. Ma alóí tở bữn sang Yiang Sursĩ, án ca tẽng túc culám khám ramúh. Ông Yiang Sursĩ toáp hái cóq khẽn mantái níc. Amen.

²⁶ Ngkíq Yiang Sursĩ calõih alóí yõn alóí túng táq puai mút sâuq alóí yoc. Bữn máh mansẽm tở ẽq bẽq noâng cốp samiang. Ma alóí yoc ẽ bữn mansẽm ratuaq mansẽm. ²⁷ Máh samiang la machóng ki tê. Alóí tở ẽq ẽ bữn noâng mansẽm. Ngkíq mút pahõm alóí dec-padéc yoc ẽ táq ranáq sâuq, yoc ẽ bữn samiang ratuaq samiang. Cỗ tian alóí táq ranáq sâuq ngkíq, alóí roap tột yõn tở alóí bữm.

²⁸ Yuaq alóí tở ẽq Yiang Sursĩ ndõm mút pahõm alóí, ngkíq Yiang Sursĩ calõih alóí yõn ngê sâuq ẽn ndõm mút pahõm alóí. Ranáq alóí táq tở bữn cõt kia ntróu. ²⁹ Mút pahõm alóí bữn moang ọc sâuq. Alóí loài lúq; alóí ham cớng noau; alóí táq sâuq chók yóu; alóí manoaq sa-on tẽ manoaq; alóí cachĩt cũai; alóí ralõih; alóí cakéq; alóí kêt yóu; alóí voõq sâuq yóu; ³⁰ alóí pai santoiq sasrúc; alóí kêt Yiang Sursĩ; alóí lóc-lár yóu; alóí ẽq cũai canõh achưng alư cốp khẽn alóí; alóí khẽuq lúq táq ranáq sâuq; alóí tở bữn trĩh parnai mpiq mpoaq; ³¹ alóí sacũl

lứq; alói ữq tư sâng; alói ốq mút ayooq yóu; alói
tở bữn sâng sarũiq táq yóu. ³² Alói khoiq dáng
chơ Yiang Sursĩ anoat cũai táq ngkíq cóq cuchĩt.
Ma noâng alói tở ểq táh ranáq ki, cớp alói sâng
bũi yõn yóu táq ngkíq tê.

2

Yiang Sursĩ Rablớh Dũ Náq Cũai

¹ Ngkíq anhia chõỉ chanchóm Yiang Sursĩ tở
bữn rablớh anhia. Anhia đốq tểq cũai canõh táq
lôih, ma toâq anhia toâp táq lôih, la machớng
anhia tểq tở anhia bữm. ² Háỉ dáng chơ Yiang
Sursĩ rablớh máh cũai táq ranáq ngkíq; cớp
Yiang Sursĩ rablớh p̄ieiq lứq. ³ Anhia tểq cũai
canõh táq lôih, ma anhia táq machớng ki tê,
anhia chõỉ chanchóm Yiang Sursĩ tở bữn rablớh
anhia. ⁴ Yiang Sursĩ sarũiq táq anhia sa-ữi lứq,
cớp án tanhĩr níc anhia. Ma nõq anhia noâng
yoc sadẽng ốc ki? Yiang Sursĩ sarũiq táq anhia
cõ án yoc anhia ngin lôih lêq cõt mút tamái ển.
⁵ Anhia bữn mút coang lứq, tở ểq tamứng Yiang
Sursĩ cớp tở ểq ngin lôih. Táq ngkíq la samoât
anhia parôm đốq máh ốc lôih yõn toau toâq
tangái Yiang Sursĩ rablớh nheq tữh cũai. Tangái
ki, Yiang Sursĩ lứq apáh án rablớh tanoang lứq
dũ náq cũai. ⁶ Tâng tangái ki, Yiang Sursĩ lứq
culáh cóng yõn dũ náq cũai, puai loah máh
ranáq alói khoiq táq. ⁷ Bữn cũai cutóng níc táq
ranáq o cõ alói yoc lứq ỡt ntốq ang-ữr cớp Yiang
Sursĩ. Alói yoc án khẽn alói, cớp yõn alói tở bữn
cuchĩt. Máh cũai ki Yiang Sursĩ yõn tamooq

mantái níc. ⁸ Ma bữn cũai bữn mút pahõm dóq rasuon loah. Alóit tở ẽq trĩh ốc pĩeiq. Alóit yoc ẽ trĩh ống ốc tở pĩeiq sâng. Yiang Sursĩ sâng cutâu mút lứq chóc cũai ki, cớp án ùan lứq chóc alóit. ⁹ Tangái ki ốc bap cớp ốc ngua toâq pữ dũ náq cũai ca táq ranáq sâuq. Dâu lứq ốc nâi toâq pữ máh cũai I-sarel; ntun ẽn ốc nâi toâq pữ máh cũai tở cõn cũai I-sarel hữ. ¹⁰ Ma máh cũai táq ranáq o, Yiang Sursĩ yõn alóit ốt cớp án. Án khẽn alóit, cớp án yõn alóit ốt ien khẽn níc. Dâu lứq ốc nâi toâq pữ máh cũai I-sarel; ntun ẽn ốc nâi toâq pữ máh cũai tở cõn cũai I-sarel hữ. ¹¹ Yuaq yáng moat Yiang Sursĩ dũ náq cũai la lĩ-ralĩ nheq.

Hái Cóc Trĩh Phễp Rit Yiang Sursĩ

¹² Cũai tở cõn cũai I-sarel tở bữn dáng phễp rit Yiang Sursĩ atõng na Mõi-se. Khân alóit ma táq lôih, tở bữn ntróu alóit dáng tở la tở bữn dáng tễ phễp rit Mõi-se. Yiang Sursĩ noâng rablớh cớp táq alóit. Cớp máh tốp I-sarel ca dáng chơ phễp rit Mõi-se, toâq alóit táq lôih, Yiang Sursĩ rablớh cớp táq alóit puai phễp rit Mõi-se. ¹³ Yuaq cũai tở bữn ốt tanoang o yáng moat Yiang Sursĩ cõ alóit dáng phễp rit Yiang Sursĩ yõn na Mõi-se. Ma lứq samoât, cũai ốt tanoang o yáng moat Yiang Sursĩ cõ alóit trĩh phễp rit ki. ¹⁴ Cũai tở cõn cũai I-sarel, alóit tở bữn bữn phễp rit Mõi-se. Ma toâq mút pahõm alóit chanchóm ẽ táq ranáq o, ốc chanchóm ki cõt samoât phễp rit yõn alóit. ¹⁵ Cũai aléq táq ngkíq, ki alóit apáh alóit bữn phễp rit tâng mút pahõm alóit. Cớp sarnóm

alóí bữm apáh ngkíq tê, yuaq sarnóm alóí tểq tở la bễng ranáq alóí táq. ¹⁶ Máh ramứh ki, Yiang Sursĩ ẽ apáh nữ-ra toáq tangái án yỗn Yê-su Crít rablớh nheq tữh cũai. Tangái ki án rablớh máh ốc cutooq tâng mứt pahỗm cũai.

Tổp I-sarel Cóp Phễp Rit Yiang Sursĩ

¹⁷ Ma máh anhia ca ngin anhia la cũai I-sarel, cỗ anhia ươ tể phễp rit Yiang Sursĩ, cốp anhia pai mantoâr anhia ốt cheq Yiang Sursĩ. ¹⁸ Anhia pai anhia khoiq dáng chơ ranáq Yiang Sursĩ yoc anhia táq, cốp anhia dáng rườh sâuq cốp o, yuaq anhia khoiq rien phễp rit Mũi-se. ¹⁹ Anhia chanchóm anhia la cũai ayông cũai sũt moat, alóí ca tở yũah dáng tể ngê Yiang Sursĩ. Anhia pai anhia la samoât tabong yỗn alóí ca ốt tâng ntốq canám. ²⁰ Anhia chanchóm anhia la máh thâi atỡng cũai sacũl, alóí ca tở yũah dáng ntróu tể ngê Yiang Sursĩ. Cốp anhia cõt samoât thâi atỡng carnễn, yuaq anhia atỡng cũai yỗn dáng bĩq sâng tể ngê Yiang Sursĩ. Anhia pai ngkíq, yuaq anhia chanchóm cỗ anhia bữn phễp rit Yiang Sursĩ, anhia dáng cốp sapủh dũ ốc. ²¹ Anhia atỡng cũai canỗh, ma anhia tở bữn atỡng yỗn tở anhia bữm. Anhia atỡng cũai canỗh: “Chỗi tutuoiq!” Ma anhia toáp tutuoiq. ²² Anhia atỡng cũai canỗh: “Chỗi ỉt lacuoi noau!” Ma anhia toáp ỉt lacuoi noau. Anhia pai anhia sâng a-ỉ lứq tâng mứt toáq cũai canỗh sang máh rup atĩ cũai táq, ma anhia toáp mut tuoiq ỉt rup ki tể đống sang alóí. ²³ Anhia khễn tở bữm,

pai anhia bữn phễp rit Yiang Sursĩ, ma anhia tở bữn trĩh phễp rit ki. Ngkĩq anhia táq yỗn Yiang Sursĩ casiet táq. ²⁴ Tâm saráq Yiang Sursĩ tễ mbốq khoiq pai tễ anhia cũai I-sarel neq: “Cỗ tian anhia, ngkĩq máh cũai tở cõn cũai I-sarel ma mumat Yiang Sursĩ.”

²⁵ Anhia tốp I-sarel đốq táq rit cứt đốq apáh anhia puai ngê Yiang Sursĩ. Khân anhia trĩh phễp rit Yiang Sursĩ, tếc ki lứq cõt kia yỗn anhia. Ma khân anhia tở bữn trĩh phễp rit ki, tếc anhia táq ki tở bữn cõt kia ntróu. ²⁶ Máh cũai tở cõn cũai I-sarel tở bữn táq tếc ki. Ma khân alóí trĩh phễp rit Yiang Sursĩ, Yiang Sursĩ nhêng chu alóí samoât alóí bữn tếc ki tê. ²⁷ Anhia tốp I-sarel bữn tâm saráq phễp rit Yiang Sursĩ chơ, cớp anhia táq rit cứt đốq apáh anhia puai ngê Yiang Sursĩ. Ma noâng anhia tở bữn trĩh phễp rit Yiang Sursĩ. Ma alóí ca tở cõn tốp anhia, lứq alóí tở bữn táq tếc ki, ma noâng alóí trĩh phễp rit Yiang Sursĩ. Táq ngkĩq alóí apáh anhia tốp I-sarel la cũai lôih. ²⁸ Khân ngkĩq, noau la lứq cũai I-sarel? Tở bữn dũ náq tễ tống toiq Yacốp ca táq rit cứt puai phễp rit Mũi-se, la lứq cũai I-sarel. ²⁹ Ma máh cũai sa-âm cớp trĩh samoât samơi, cũai ki la lứq cũai I-sarel yáng moat Yiang Sursĩ. Yiang Sursĩ lứq khễn cũai ki, tở cõn cũai khễn alóí. Cũai ki la machống alóí bữn tếc tâng mút alóí, tở cõn tếc tâng tở. Tếc ki Raviei Yiang Sursĩ táq tâng mút pahỗm cũai ki. Phễp rit la tở tềq táq ranáq nâi tâng mút pahỗm.

3

Tõ Bữn Noau Ớt Tanoang O Yáng Moat Yiang Sursĩ

¹ Khân ngkíq, cõt cũai I-sarel bữn kia ntróu yáng moat Yiang Sursĩ tõ? Cóp táq rit cútt alóí bữn kia ntróu tõ? ² Lứq bữn kia! Tốp I-sarel khoiq roap sa-ũĩ ốc toâr tẽ Yiang Sursĩ. Ốc toâr clũĩ tẽ canốh la Yiang Sursĩ yỗn tốp I-sarel kĩaq tâm saráq án. ³ Lứq bữn cũai tẽ tốp I-sarel tõ bữn sa-âm Yiang Sursĩ, ma Yiang Sursĩ noâng táq tapun máh santomq án khoiq ữq chơ. ⁴ Tam nehq tữh cũai tâng cốc cutẽq nâi táq ntống lauq, ma hái dáng Yiang Sursĩ la lứq tanoang; án atống moang ốc p̄ieiq sâng. Tâng tâm saráq Yiang Sursĩ tẽ mbốq bữn noau khoiq chĩc tẽ Yiang Sursĩ neq:

“Têq cũai dáng anhia tanoang o
toâq alóí sâng parnai anhia pai.
Toâq anhia rasữq,
anhia bữn riap níc.”✧

⁵ Cũai tâng dời yoc ẽ pai neq: “Khân hái táq ranáq lôih, ranáq lôih ki apáh yỗn cũai dáng raloaih la Yiang Sursĩ lứq tanoang o. Ngkíq Yiang Sursĩ táq tõ bữn p̄ieiq khân án táq hái cồ tian hái táq ranáq lôih.”

⁶ Ma lứq samoât hái tõ têq pai Yiang Sursĩ táq tõ bữn p̄ieiq! Khân Yiang Sursĩ tõ bữn lứq tanoang, nốq têq án rablốh nehq tữh cũai?

⁷ Bữn cũai blốh neq: “Khân cũai khễn Yiang Sursĩ, cóp alóí bữn dáng án atống tanoang lứq

cỗ alóí sâng cứq atōng tở p̄ieiq, ki nỏq Yiang Sursĩ tểq cứq táq lỏih?”

8 Chơ bữn án ca ẽ pai neq: “Ậu! Hái táq sậuq palứq! Ngkíq noau bữn khễn Yiang Sursĩ sa-ữi hỡn ẽn.”

Cóp bữn cũai tũn cứq, pai cứq atōng ngkíq tê. Ma nỡ-ra Yiang Sursĩ lứq táq máh cũai pai ngkíq.

9 Ntrớu hái pai tể máh ốc ki? Cũai I-sarel o hỡn tể cũai canỏh tở? Lứq tở cỡn ngkíq! Cứq khoiq atōng chơ, cũai I-sarel cóp cũai tở cỡn cũai I-sarel la machớng nheq. Dũ náq la cũai lỏih. 10 Tậng tâm saráq Yiang Sursĩ tể mbốq noau khoiq chĩc neq:

“Tở bữn noau ớt tanoang o yáng moat Yiang Sursĩ,
lứq tở va manoaq.✧

11 Tở bữn noau sâng cóp dáng tể ngê Yiang Sursĩ.
Cóp tở bữn noau ravoât Yiang Sursĩ.

12 Dũ náq alóí nguai chíq tể Yiang Sursĩ;
chơ alóí ốq kia loâng.

Tở bữn noau táq ranáq o,
lứq tở va manoaq.

13 Máh sớng cũai táq ntỡng
samoât ping cumuiq noau pớh, nsóq lứq.

Lieih alóí đốq pai ốc raphếq.

Cóp bỗq alóí aloỏh santoiq samoât pih cusân tur.✧

14 Bỗq alóí táq ntỡng moang santoiq lóc-lár cóp ntáng ahớ.

15 Chái lứq alóí yoc ẽ cachĩt cũai canỏh.

- 16 Ntốq léq alóí pởq, alóí talốh ntốq ki, cớp alóí táq yỗn noau sâng nguạ lứq.
- 17 Alóí tở dáng ớt ratoì cớp yớu.
- 18 Cớp alóí tở bữn ngcốh thág Yiang Sursĩ. "✧
- 19 Ngkíq hái dáng, Yiang Sursĩ yỗn tốp I-sarel bữn phếp rit cớ án ểq alóí puai samoát samơi phếp rit ki. Yiang Sursĩ táq ngkíq yỗn dũ náq alóí dáng alóí bữn lờih. Cũai aléq la tở têq suon pai án tở bữn bữn lờih. 20 Ngkíq tở bữn cũai aléq têq pai án cớt tanoang o yáng moat Yiang Sursĩ cớ nhơ án trỉh phếp rit Mòi-se. Lứq samoát, Yiang Sursĩ yỗn phếp rit ki pở nheq tữh cũai yỗn alóí dáng alóí bữn lờih.

Yiang Sursĩ Táq Yỗn Cũai Têq Ớt Tanoang O Yáng Moat Án Cớ Nhơ Yê-su Crít

21 Ma sanua Yiang Sursĩ khoiq apáh yỗn máh cũai dáng têq alóí ớt tanoang o yáng moat Yiang Sursĩ. Phếp rit Yiang Sursĩ yỗn na Mòi-se atống tể ốc nài. Cớp cũai tang bớq Yiang Sursĩ tể mbốq khoiq atống ngkíq tê. Ma ốc nài hái tở bữn bữn cớ hái puai phếp rit. 22 Yiang Sursĩ táq yỗn cũai ớt tanoang o yáng moat án cớ nhơ alóí sa-âm Yê-su Crít. Án táq ngkíq yỗn dũ náq cũai sa-âm, yuaq án ayooq dũ náq cũai lĩ-ralĩ. 23 Dũ náq cũai bữn lờih; ngkíq alóí tở bữn bữn roap ang-ữr tể Yiang Sursĩ. 24 Ma Yiang Sursĩ chuai miat cũai yỗn têq ớt tanoang o yáng moat án. Án yỗn Yê-su Crít sểng chíl chuai alóí. 25 Yiang Sursĩ yỗn Yê-su Crít cuchĩt tang cũai, đốq têq án táh

✧ 3:18 3:18 Ê-sai 59:7-8

lôih cũai. Khân cũai aléq noap Yê-su Crît cuchit tang alói, ngkíq Yiang Sursĩ lúq pupút nheq máh lôih alói. Yiang Sursĩ táq ngkíq, đòq apáh án táq tanoang tapúng lúq bo án táh lôih yõn cũai tể dõih nhũang, yuaq Yiang Sursĩ khoiq dáng nhũang chơ nỡ-ra Yê-su lúq cuchit tang cũai ki. Ngkíq Yiang Sursĩ tanhĩr sâng máh lôih cũai táq tể nhũang Yê-su tở yũah cõt. ²⁶ Ma sanua Yiang Sursĩ yoc ẽ apáh án tanoang tapúng lúq. Ngkíq án táq yõn cũai tẽq õt tanoang o yáng moat án, cõ alói sa-âm Yê-su.

²⁷ Khân Yiang Sursĩ khoiq táq ngkíq yõn hái, bữn noau tẽq pai án táq bữm ranáq o tở? Lúq tở tẽq. Cõ nốq alói tở tẽq pai ngkíq? Cõ Yiang Sursĩ tở yõn máh cũai õt tanoang o yáng moat án yuaq alói trĩh phẽp rit Mõi-se. Yiang Sursĩ táq yõn máh cũai tẽq õt tanoang o yáng moat án, la cõ alói sa-âm sâng. ²⁸ Ngkíq hái dáng samoat samõi máh cũai tẽq õt tanoang o yáng moat Yiang Sursĩ cõ nỡ alói sa-âm, tở cõn cõ nỡ alói trĩh phẽp rit Mõi-se. ²⁹ Anhia chanchóm Yiang Sursĩ chuai ống cũai I-sarel sâng tở? Án chuai ma tở bữn máh cũai tở cõn cũai I-sarel? Lúq samoat, Yiang Sursĩ chuai nheq tữh cũai, tở cõn ống cũai I-sarel sâng. ³⁰ Bữn ống muoi Yiang Sursĩ sâng. Tốp I-sarel tẽq bữn mút tanoang o yáng moat Yiang Sursĩ, khân alói sa-âm. Cóp cũai tở cõn tể tốp I-sarel tẽq bữn mút tanoang o yáng moat Yiang Sursĩ tẽ, khân alói sa-âm, la machóng nheq. ³¹ Khân hái sa-âm Yê-su Crît, hái pupút chíq phẽp rit Yiang Sursĩ yõn na Mõi-

se tở? Lứq tở bữn ngkíq! Khân hái sa-âm Yê-su, hái noap phễp rit ki la lứq pñeiq.

4

A-praham Ớt Tanoang O Yáng Moat Yiang Sursĩ Cỗ Án Sa-âm

¹ Sanua cứq yoc atỡng anhia tễ A-praham, la achúc achiac tốp I-sarel tễ dẫu lứq. ² Khân A-praham Ớt tanoang o yáng moat Yiang Sursĩ cỗ tễ ranáq án táq, ki tềq án khễn tở án bữm. Ma lứq samoât án tở tềq khễn ngkíq yáng moat Yiang Sursĩ. ³ Tâm saráq Yiang Sursĩ tễ mbốq khoiq pai tễ A-praham neq:

“A-praham sa-âm Yiang Sursĩ;
ngkíq Yiang Sursĩ noap án la cũai tanoang o.”

⁴ Cứq sacâm neq: Khân bữn cũai tuthễ, án cóq bữn práq cóng án. Práq ki hái tở tềq pai ncháu án chuai miat sâng. Ma práq ki la cóng án táq ranáq. ⁵ Ma Yiang Sursĩ chuai cũai lôih yỗn cữt tanoang o yáng moat án, la cỗ cũai ki sa-âm, tở cữn cỗ nhơ cũai ki táq ranáq ntrứu. ⁶ Tễ mbốq, puo Davít khoiq atỡng machớng ki tề. Án pai bốn lứq cũai ca Yiang Sursĩ khoiq noap tanoang o, cỗ nhơ alóí sa-âm, tở cữn cỗ tễ ranáq alóí táq. ⁷ Davít pai neq:

“Bốn lứq máh cũai ca Yiang Sursĩ táh lôih yỗn.
Án khoiq pul clớp chơ lôih alóí,
tở bữn noau hữm noâng.

⁸ Bồn lứq cũai ca Yiang Sursĩ tở bữn noap noâng lờih alói." ✧

⁹ Ốc bốn nâi toâq pở ống cũai táq rit cút tở? Tở cởn ngkíq! Ốc bốn nâi lứq toâq dểh pở cũai tở bữn táq rit cút hỡ. Hái dáng chơ tể A-praham, Yiang Sursĩ noap án tanoang o la cở án sa-âm. ✧

¹⁰ Bo léq Yiang Sursĩ noap A-praham tanoang o? Nhũang tở la ntun A-praham táq rit cút? Lứq Yiang Sursĩ noap A-praham tanoang o bo án tở yũah táq rit cút, tở cởn ntun án táq tếc ki.

¹¹ Vót Yiang Sursĩ noap A-praham tanoang o, chơ A-praham táq rit cút đởq apáh mút pahõm án tanoang o. Ma A-praham bữn mút tanoang o cở nhơ án sa-âm, tể nhũang án tở yũah táq rit cút. Ngkíq A-praham cõt samoât achúc achiac cũai tở bữn táq rit cút tê, khân alói sa-âm Yiang Sursĩ án têq noap alói tanoang o. ¹² Cóp A-praham la achúc achiac máh alói ca táq rit cút tê. Ma án tở bữn achúc achiac alói cở alói táq rit cút. Ma lứq án cõt achúc achiac alói, yuaq alói sa-âm machóng án sa-âm tể nhũang án tở yũah táq tếc cút.

Cũai Aléq Yoc Ế Bữn Ốc Yiang Sursĩ Ừq, Cóq Án Sa-âm

¹³ Yiang Sursĩ khoiq ừq cóp A-praham cóp nheq tổng toiq A-praham la Yiang Sursĩ lứq yõn alói ndõm máh cruang cutểq nâi. Yiang Sursĩ ừq ngkíq la cở nhơ A-praham sa-âm, tở cởn cở án trỉh phếp rit Mõi-se. Cở nhơ A-praham sa-âm,

✧ **4:8** 4:8 Ừat Khển 32:1-2 ✧ **4:9** 4:9 Saráq Tể Dâu 15:6

ngkíq Yiang Sursĩ noap A-praham tanoang o.
 14 Khân Yiang Sursĩ ỹq chuai óng máh cũai ca
 puai phễp rit Mũi-se, ki tữ bữn kia ntrứu hái
 sa-âm, cớp tữ bữn lứq ntrứu tễ ốc Yiang Sursĩ
 khoiq ỹq cớp A-praham cớp tống toiq A-praham
 hữ. 15 Khân cũai aléq ma táh phễp rit Yiang
 Sursĩ, lứq Yiang Sursĩ táq cũai ki. Ma khân Yiang
 Sursĩ tữ bữn yỗn phễp rit ntrứu, ki hái tữ têq pai
 noau bữn lỏih.

16 Máh ốc Yiang Sursĩ khoiq ỹq cớp A-praham,
 lứq ốc ki toáq pữ A-praham cồ nhữ án sa-âm.
 Yiang Sursĩ táq ngkíq, yuaq án yoc ẽ chuai miat
 máh tống toiq A-praham. Án ẽ chuai alới ca puai
 phễp rit Mũi-se, cớp án ẽ chuai alới ca sa-âm
 ariang A-praham sa-âm tê. Ngkíq A-praham la
 samoát achúc achiac dũ náq cũai sa-âm. 17 Nài
 la machóng noau khoiq chĩc tễ A-praham tâng
 tâm saráq Yiang Sursĩ tễ mbốq. Noau chĩc neq:
 “Cứq táq yỗn mới cõt achúc achiac sa-ữi cru-
 ang.”✧

A-praham sa-âm santoiq Yiang Sursĩ. Cớp máh
 ốc Yiang Sursĩ khoiq ỹq, ốc ki lứq toáq. Yiang
 Sursĩ lứq chuai cũai cuchĩt yỗn têq tamoong
 loah. Cớp Yiang Sursĩ têq táq ốc tữ bữn bữn
 yỗn cõt bữn. 18 A-praham khoiq vót ngư amia
 con, ma noâng án nguang Yiang Sursĩ yỗn án
 bữn con samiang, yuaq Yiang Sursĩ khoiq ỹq.
 Ngkíq A-praham sa-âm án lứq cõt achúc achiac
 sa-ữi cruang, yuaq Yiang Sursĩ khoiq ỹq cớp án

✧ 4:17 4:17 Saráq Tễ Dâu 17:5

neq: “Tống toiq mới lứq cõt sa-ữi cruang.” ☆ 19 A-praham khoiq thâu lứq chơ. Anhúq án cheq muoi culám cumo. Cóp Sara, lacuoi án, khoiq vót ngư amia con. Ma noâng A-praham sa-âm níc. 20 Án tở bữn tồh voal ntróu tâng mút pahõm án tễ ốc Yiang Sursĩ ữq cốp án. Ma án sa-âm pacái lứq. Cốp án khễn níc Yiang Sursĩ. 21 A-praham dáng samoât samoi, Yiang Sursĩ têq táq máh ốc án khoiq ữq chơ. 22 Ngkíq Yiang Sursĩ noap A-praham la cũi tanoang o yáng moat án. ☆ 23 Tâng tâm saráq Yiang Sursĩ tễ mbốq noau khoiq chĩc neq:

“Yiang Sursĩ noap án tanoang o cũi án sa-âm.”

Án ca khoiq chĩc ốc ki, án tở bữn atõng tễ ống A-praham sâng. 24 Ma án atõng dẽh tễ hái hõ, yuaq Yiang Sursĩ noap hái tanoang tê khân hái sa-âm Yiang Sursĩ táq yõn Yê-su, Ncháu hái, tamoong loah tễ cuchĩt. 25 Yiang Sursĩ chiau Yê-su cuchĩt cũi tian lôih hái. Cốp án yõn Yê-su yuor tamoong loah yõn hái têq ốt tanoang o yáng moat Yiang Sursĩ.

5

Hái Ốt Tanoang O, Ki Hái Bữn Ốc Ien Khẽ

1 Yuaq Yiang Sursĩ yõn hái ốt tanoang o yáng moat án cũi nhơ hái sa-âm, ngkíq hái ốt muoi mút cốp Yiang Sursĩ cũi nhơ Yê-su Crĩt, Ncháu hái. 2 Cũi hái sa-âm Yê-su, ngkíq hái têq toâq sễq pữ Yiang Sursĩ cốp nguang án chuai miat hái.

☆ 4:18 4:18 Saráq Tễ Dâu 15:5 ☆ 4:22 4:22 Saráq Tễ Dâu 15:6

Cóp hái sâng bũ lứq, yuaq hái nguang tangái hái bữn ốt cóp Yiang Sursĩ tê. ³ Tở bữn óng ngkíq sâng, ma hái sâng bũ tê toâq hái ramóh túh coat. Yuaq hái dáng, khân hái tanhĩr túh coat sanua, ốc ki arĩen yỗn hái rơi tanhĩr ốc túh coat ntun hữ. ⁴ Khân hái rơi tanhĩr ốc túh coat, Yiang Sursĩ lứq sâng bũ cóp hái. Khân hái dáng Yiang Sursĩ sâng bũ cóp hái, ngkíq hái nguang Yiang Sursĩ chuai hái. ⁵ Khân hái nguang níc ốc ki, hái tở bữn cõt ngua ntrứu, yuaq Yiang Sursĩ khoiq yỗn Raviei án ốt tâng mút pahồm hái. Cóp Raviei Yiang Sursĩ atống hái là Yiang Sursĩ ayooq lứq hái.

⁶ Bo hái tở têq táq ntrứu đợq chuai amoong tở hái bữm, lứq bo ki toâp toâq ngư Crĩt cuchĩt tang máh cũai lôih. ⁷ Lợq náq cũai rơi pruum pláih mang án đợq chuai yóu, tam yóu án la cũai mantoat. Pĩeiq lơ bữn bĩq náq rơi chũuq cuchĩt tang yóu, khân yóu án lứq cũai o. ⁸ Ma hái la moang cũai lôih, ma noâng Crĩt cuchĩt tang hái. Yiang Sursĩ táq ngkíq đợq apáh án ayooq hái sa-ũĩ lứq. ⁹ Nhơ Yê-su cuchĩt tang hái, ngkíq hái cõt tanoang o yáng moat Yiang Sursĩ. Hái tở bữn ngcõh noâng Yiang Sursĩ táq hái tâng tangái án táq máh cũai lôih. ¹⁰ Bo nhũang, hái par-ũal cóp Yiang Sursĩ, ma sanua hái cõt ratoi loah cóp án cõ nhơ Con án chũuq cuchĩt tang hái. Cõ hái ốt ratoi cóp Yiang Sursĩ, ngkíq hái nguang án chuai amoong hái cõ nhơ Yê-su tamoong loah tễ cuchĩt. ¹¹ Ma clũĩ tễ ki ẽn, hái cõt bũi o cóp Yiang Sursĩ cõ nhơ Yê-su Crĩt, Ncháu hái, táq yỗn hái cõt ratoi loah cóp Yiang Sursĩ.

Adam Cóp Yê-su Crît

¹² Tể dâu lứq ốc lôih toâq pở cốc cutêq nâi la cở tian tể manoaq.* Cóp ốc cuchĩt toâq la cở tian ốc lôih ki. Ốc cuchĩt nâi toâq pláh dũ tổ cũai pưn paloõng cutrúq nâi, yuaq dũ náq cũai bữn lôih.

¹³ Tể nhũang Yiang Sursĩ tở yũah yõn phễp rit na Mũi-se, ốc lôih khoi q bữn chơ tăng cốc cutêq nâi. Ma bo Yiang Sursĩ tở yũah yõn phễp rit án, hái tở têq pai cũai táq lôih cở alói táh phễp rit Yiang Sursĩ. ¹⁴ Ma tể dũi Adam toau toâq dũi Mũi-se, dũ náq cũai lứq cuchĩt, dểh cũai tở bữn táq lôih ariang Adam, án ca tở bữn trĩh parnai Yiang Sursĩ. Adam la ngól yõn nheq tữh cũai; machớng Yê-su, án ca toâq ntun la ngól yõn nheq tữh cũai tê.

¹⁵ Ma bar ngól ki tở bữn machớng. Muoi la ngól ốc lôih; muoi la ngól ốc chuai miat. Clứng lứq cũai cuchĩt cở tian Adam táq lôih. Ma toâr clữi tể ốc ki la Yiang Sursĩ chuai miat cũai cở nhơ Yê-su Crît. Ngkĩq clứng lứq cũai têq tamoong cở nhơ Yê-su Crît chuai miat alói. ¹⁶ Yiang Sursĩ chuai miat la mpha tể ranáq lôih Adam táq. Cở tian manoaq Adam táq lôih, ngkĩq Yiang Sursĩ anoat dũ náq cũai cóq cuchĩt. Ma cở nhơ Yiang Sursĩ chuai miat hái, ngkĩq tở bữn ntróu hái bữn lôih sa-ũi, hái têq ốt tanoang o yáng moat án.

¹⁷ Cở tian manoaq Adam táq lôih, ngkĩq dũ náq cũai cóq cuchĩt ariang án tê. Ma toâr clữi tể ki la ranáq Yê-su Crît chuai hái. Cở nhơ manoaq Yê-su

* **5:12** 5:12 Cũai manoaq ki bữn ramứh Adam.

Crít, Yiang Sursĩ chuai miat hái yõn cõt tanoang o yáng moat án. Cóp án yõn hái bữn tamoong parnơi tâng ntốq án sốt.

¹⁸ Ngkíq, cõ tian tẽ muoi ranáq lôih, Yiang Sursĩ ma anoat dũ náq cũai cóq cuchĩt. Machóng ki tê, cõ nhơ tẽ muoi ranáq o, Yiang Sursĩ yõn nheq tữh cũai têq õt tanoang o yáng moat án, cóp yõn alóih bữn tamoong. ¹⁹ Clúng lứq cũai cõt lôih cõ tian manoaq Adam tở bữn trĩh Yiang Sursĩ. Machóng ki tê, clúng lứq cũai têq õt tanoang o yáng moat Yiang Sursĩ, cõ nhơ manoaq Yê-su Crít trĩh Yiang Sursĩ. ²⁰ Yiang Sursĩ yõn phếp rit án na Mòi-se, yuaq án yoc ẽ yõn cũai dáng alóih bữn lôih sa-ữi. Tam cũai táq lôih sa-ữi lứq, ma Yiang Sursĩ noâng chuai miat cũai clữi tẽ óc lôih alóih khoiq táq. ²¹ Tẽ nhũang, óc lôih cõt sốt tâng mút pahõm cũai. Cõ tian óc lôih, ngkíq yuaq cũai cuchĩt. Ma sanua Yiang Sursĩ yõn óc chuai miat ẽn cõt sốt tâng mút pahõm cũai. Ngkíq cũai têq bữn mút pahõm tanoang o, cóp bữn tamoong mantái níc cõ nhơ Yê-su Crít, Ncháu hái.

6

Lôih Táq Yõn Cũai Cuchĩt; Yê-su Táq Yõn Cũai Tamoong

¹ Khân ngkíq, nốq hái ẽ pai? O hái táq lôih níc, yõn Yiang Sursĩ têq chuai hái sa-ữi lứq ẽn tở? ² Lứq tở p̄ieiq ngkíq! Hái la samoât cũai cuchĩt. Khân cũai khoiq cuchĩt chơ, alóih tở têq táq lôih noâng. ³ Nốq riang pai anhia tở bữn

dáng tễ phễp rit táq batêm? Bo hái roap batêm, hái táq tếc hái bữn muoi mút cớp Yê-su Crít. Nài la samoât riang hái cuchit cớp Yê-su tê. ⁴ Từ hái roap batêm, la samoât hái pruum cuchit parnoi cớp Yê-su, cớp samoât noau túp hái parnoi cớp Yê-su tê. Ma cõ nhơ tễ chớc án, Yiang Sursĩ táq yõn Yê-su tamoong loah tễ cuchit. Cớp án táq machóng ki tê yõn hái têq tamoong loah cớp cõt tamái ẽn.

⁵ Khân hái lứq pruum cuchit parnoi cớp Yê-su, ngkíq hái lứq bữn tamoong loah machóng án tê. ⁶ Hái dáng samoât samoi mút tiaq hái khoiq cuchit parnoi cớp Crít tâng aluang sangcáng. Bo ki Yiang Sursĩ pupút nheq ốc lôih tễ mút tiaq; chơ hái tở bữn sâng yoc ẽ táq noâng ranáq lôih. ⁷ Khân cũai khoiq cuchit chơ, ngkíq yiang Satan tở têq radững noâng án táq ranáq lôih. ⁸ Khân hái ma cuchit parnoi cớp Crít, ngkíq hái sa-âm hái lứq bữn tamoong loah parnoi cớp án tê. ⁹ Hái khoiq dáng chơ Crít tamoong loah tễ cuchit, cớp án tở nai cuchit noâng. Ốc cuchit tở rơi táq ntrầu án. ¹⁰ Crít cuchit muoi trỗ sâng đờq chuai cũai lôih. Chơ sanua án tamoong loah đờq táq máh ranáq Yiang Sursĩ yõn án táq. ¹¹ Machóng ki tê, cóq anhia chanchóm anhia la samoât cũai cuchit, tở têq táq noâng ranáq lôih. Ma cóq anhia chanchóm anhia la samoât cũai tamoong loah tê, yõn anhia táq máh ranáq Yiang Sursĩ yõn anhia táq.

¹² Chõi yõn ốc lôih táq sốt noâng tâng mút anhia; ngkíq anhia tở bữn puai noâng rangứh

anhia bữm. ¹³ Chỏi chiau tở anhia yỗn ranáq lờih samoât mút sâuq đốq yoc ẽ táq. Ma cóq anhia chiau tở anhia yỗn Yiang Sursĩ, yuaq Yiang Sursĩ khoiq yỗn anhia tamoong loah tẽ cuchĩt, cóp án chuai anhia yỗn táq ranáq tanoang o. ¹⁴ Ốc lờih tở têq cõt sốt noâng anhia. Cóp phễp rit Mũi-se tở têq cõt sốt noâng anhia tê. Ma lứq ốc chuai miat tẽ Yiang Sursĩ toáp cõt sốt anhia.

Tổp Sa-âm Yê-su Yoc Ế Táq Tanoang O

¹⁵ Khân ngkíq, nốq hái ẽ pai? Sanua Yiang Sursĩ chuai miat hái, cóp phễp rit Mũi-se tở bữn sốt noâng hái. Ngkíq, hái têq táq ranáq lờih tở? Lứq tở têq! ¹⁶ Nốq riang pai anhia tở bữn dáng, khân anhia trĩh ngê aléq, anhia lứq cõt sũl ngê ki. Ngkíq, khân anhia trĩh ngê sâuq, ki anhia cõt sũl yỗn ngê sâuq. Chơ cóng tẽ ngê sâuq la anhia cuchĩt. Ma khân anhia trĩh ngê Yiang Sursĩ, ki anhia cõt sũl yỗn Yiang Sursĩ. Cóp Yiang Sursĩ yỗn anhia bữn cóng la anhia bữn mút tanoang o yáng moat án. ¹⁷ Cứq sa-ỡn lứq Yiang Sursĩ! Bo tẽ nhũang anhia samoât sũl yỗn ngê sâuq, ma sanua anhia trĩh nheq rangứh rahỡ máh ốc pĩeiq tẽ Yê-su Crĩt, ca noau khoiq atống anhia. ¹⁸ Yiang Sursĩ khoiq acláh anhia tẽ cõt sũl ranáq lờih, cóp án táq yỗn anhia cõt sũl ranáq tanoang o ẽn. ¹⁹ Cứq atống anhia toáp parnai sacâm nũi ẽq anhia sâng raloaih lứq. Bo nhũang anhia chiau tở anhia cõt sũl táq ranáq sâuq sâng. Ngkíq mút pahỡm anhia cõt sâuq lứq ẽn. Ma sanua cóq

anhia chiau tở anhia yỗn cõt sũl ranáq tanoang o. Ngkíq mút pahõm anhia cõt bráh o lứq.

²⁰ Bo anhia cõt sũl ngê sâuq, anhia tở têq chanchóm ntróu tễ ranáq tanoang o. ²¹ Ngê anhia puai bo ki cõt kia ntróu? Lứq tở bữn cõt kia ntróu. Sanua anhia sâng casiet táq lứq cõ tian ranáq sâuq ki, yuaq cóng tễ ngê sâuq la anhia cuchĩt. ²² Ma sanua Yiang Sursĩ khoi q acláh anhia tễ ngê sâuq. Ngkíq, anhia cõt sũl Yiang Sursĩ ẽn. Cóng tễ ốc ki la anhia bữn mút bráh o cóp anhia bữn tamoong mantái níc. ²³ Yuaq cóng tễ ốc lôih la hái cuchĩt. Ma Yiang Sursĩ chuai miat yỗn hái bữn tamoong mantái níc cõ nhơ Yê-su Crĩt, Ncháu hái.

7

Sacâm Tễ Lacuoi Cayac

¹ Sễm ai ơi! Anhia la cũai khoi q dáng chơ tễ phễp rit Mõi-se. Ngkíq anhia dáng cóq cũai trĩh phễp rit bo noâng tamoong. Khân cuchĩt, cũai tở bữn trĩh noâng. ² Cứq sacâm neq: Khân bữn manoaq mansễm khoi q bữn cayac, phễp rit patâp cóq mansễm ki ốt cóp cayac án toau nheq dõih cayac án. Ma vót cayac án cuchĩt, mansễm ki racláh tễ parnai án khoi q ứq cõt lacuoi. ³ Ngkíq, khân cayac án noâng tamoong, ma án ốt cóp samiang canõh, lứq noau dõq án la ‘mansễm ẽ cachĩt cayac’.* Ma khân cayac án khoi q cuchĩt chơ, án tở bữn táq lôih ntróu khân

* **7:3** 7:3 Tở la ‘mansễm cooc noau’.

án chuaq cayac tamái. Cóp tở bữn noau đõq án la ‘mansẽm ẽ cachĩt cayac’.

⁴ Ngkĩq sẽm ai ơi, anhia la machớng ki tê. Cỗ nhơ Crĩt khoiạ cuchĩt, ngkĩq la samoât anhia cuchĩt tê. Chơ phễp rit Mũi-se tở têq pai ntrớu noâng tẽ anhia. Ma Crĩt khoiạ tamoong loah tẽ án cuchĩt. Ngkĩq, o yỗn anhia cõt muoi mút cớp án, đõq anhia têq táq ranáq o yỗn Yiang Sursĩ. ⁵ Bo hái tở yũah sa-âm, hái puai rangứh hái bữm. Ngkĩq phễp rit Mũi-se táq yỗn mút pahỡm hái chanchớm ẽ táq ranáq lôih sa-ữi lứq ẽn. Tữ hái táq ranáq ki, hái bữn cớng la hái cuchĩt. ⁶ Ma sanua phễp rit Mũi-se tở têq pai ntrớu noâng hái, yuaq hái samoât khoiạ cuchĩt chơ. Ngkĩq hái tở bữn táq noâng ranáq tiaq puai phễp rit noau khoiạ chĩc chơ. Ma sanua hái táq ranáq tamái ẽn cỗ nhơ Raviei Yiang Sursĩ yỗn hái bữn mút tamái.

Ốc Lôih Loõh Tẽ Phễp Rit Tở?

⁷ Khân ngkĩq, nõq hái ẽ pai? Têq hái pai phễp rit Mũi-se lôih tở? Lứq tở cõn ngkĩq! Phễp rit ki apáh yỗn hái dáng ốc lôih la ntrớu. Lứq samoât, cứq tở bữn dáng cứq táq lôih na sa-on cumíq ẽ bữn cớng yớu, khân phễp rit ki tở bữn pai neq: “Anhia chõi sa-on cumíq ẽ bữn cớng yớu.”[☆]

⁸ Ma toâq phễp rit ki apáh yỗn cứq dáng cứq táq lôih ham cớng noau, chơ mút cứq cõt ham sa-ữi lứq ẽn. Ma khân cứq tở bữn dáng tẽ phễp rit Yiang Sursĩ, cứq tở bữn dáng ốc ntrớu la

☆ 7:7 7:7 Loõh Tẽ Ê-yip-tô 20:17; Patâp Loah 5:21

lôih, tở la ọc tở bữn lôih. ⁹ Bo nhũang cứq tở yũah dáng tễ phễp rit Yiang Sursĩ, ngkíq cứq chanchóm cứq la cũai o. Ma toâq tangái cứq dáng ọc patâp tễ Yiang Sursĩ, tangái ki cứq dáng cứq la cũai lôih lứq. ¹⁰ Ốc ki la samoât cứq cuchĩt. Yiang Sursĩ yỗn ọc patâp ki yuaq án ễq cũai têq tamoong. Ma tữ cứq dáng tễ ọc patâp ki, cứq dáng cứq cóq cuchĩt cõ tian cứq tở bữn trĩh ọc patâp ki. ¹¹ Ốc lôih tâng mút pahõm cứq phẻq yỗn cứq tở bữn trĩh ọc patâp tễ Yiang Sursĩ. Ngkíq, ọc lôih nâi radũng yỗn cứq cuchĩt.

¹² Ngkíq hái dáng phễp rit tễ Yiang Sursĩ la lứq bráh o. Cóp máh ọc Yiang Sursĩ patâp la tở bữn sâuq ntrứu, tanoang o nheq. ¹³ Khân ngkíq, ọc o nâi táq yỗn cứq cuchĩt tở? Lứq tở cõn ngkíq! Ống ọc lôih toâp táq yỗn cứq cuchĩt. Ma phễp rit tễ Yiang Sursĩ apáh cứq bữn lôih. Ngkíq phễp rit ki la o, cóp phễp rit ki apáh lôih cứq la sâuq lứq.

Cũai Bữn Bar Mút

¹⁴ Hái dáng Raviei Yiang Sursĩ yỗn hái trĩh phễp rit Yiang Sursĩ. Ma cứq dóq ít rangứh cứq bữm. Ngkíq, samoât cứq chẻq tở bữm yỗn táq sũl ngê sâuq. ¹⁵ Cứq hữm salễh lứq cứq táq. Máh ranáq o cứq yoc ễ táq, cõt cứq tở bữn táq. Ma máh ranáq sâuq cứq tở ễq táq, cõt cứq táq. Cứq dót lứq, tở dáng nõq cứq ma táq ngkíq. ¹⁶ Khân cứq tở ễq táq ranáq sâuq, ma noâng cứq táq, ki mút cứq ngin phễp rit tễ Yiang Sursĩ la lứq p̃ieiq. ¹⁷ Ngkíq mút cứq bữm tở ễq táq ranáq

sâuq, ma ọc lôi h tâng mứt cứq radũng cứq táq ranáq sâuq. ¹⁸ Cứq đánq chơ tở bữn muoi ọc o ntróu ốt tâng mứt cứq, khân puai rangứh cứq bữm. Lứq pai mứt cứq chanchóm ẽ táq o, ma cứq tở rơi táq o. ¹⁹ Máh ranáq o cứq yoc ẽ táq, cõt cứq tở bữn táq. Ma máh ranáq sâuq cứq tở ẽq táq, cõt cứq táq. ²⁰ Khân cứq táq máh ranáq cứq tở ẽq táq, ki tở cõn cứq yoc ẽ táq ngkíq, ma ọc lôi h ca ốt tâng mứt cứq táq ngkíq.

²¹ Ngkíq riang pai cứq bữn bar mứt. Toâq cứq sânq yoc ẽ táq ranáq o, cõt cứq táq ranáq sâuq ẽn. ²² Mứt cứq yoc lứq puai phễp rit Yiang Sursĩ. ²³ Ma ariang bar ngê ki rachíl tâng mứt pahõm cứq. Sarnóm cứq yoc ngê o. Ma tở cứq cõt samoât sũl ngê sâuq. ²⁴ O, bap lứq cứq! Noau rơi chuai cứq yõn têq racláh tẽ ngê sâuq ca ẽ cachĩt cứq? ²⁵ Cứq sa-õn Yiang Sursĩ yuaq Yê-su Crĩt, Ncháu hái, rơi chuai cứq ngkíq!

Khân Yê-su Crĩt tở bữn chuai, ki cứq la neq: Mứt cứq yoc ẽ puai phễp rit Yiang Sursĩ, ma tở cứq noâng yoc ẽ puai ngê sâuq.

8

Raviei Yiang Sursĩ Ớt Cóp Háı

¹ Sanua, máh cũai ốt muoi mứt cóp Yê-su Crĩt tở bữn ngcõh noâng Yiang Sursĩ táq alói. ² Khân puai ngê sâuq, háı cóq cuchĩt. Ma cõ nhơ háı ốt muoi mứt cóp Yê-su Crĩt, ngkíq Raviei Yiang Sursĩ chuai háı yõn viaq tẽ cuchĩt cõ tian háı táq lôi h. ³ Phễp rit Yiang Sursĩ tở têq chuai amoong cũai, yuaq tở bữn noau rơi trĩh phễp

rit ki samoât samoi. Ma Yiang Sursĩ yõn Con án sêng tâng cutẽq nâi. Con ki bữn tở machóng cũai tê, ma án tở bữn táq lôih ntróu. Ngkíq Con Yiang Sursĩ chũuq cuchĩt tang máh cũai lôih. Chơ ốc lôih tở têq táq sớt noâng tâng mút hái. ⁴ Sanua hái puai rangúh Raviei Yiang Sursĩ sâng, hái tở bữn puai noâng rangúh hái bữm. Ngkíq hái têq táq o puai phễp rit Yiang Sursĩ. ⁵ Máh cũai puai rangúh alóit bữm, alóit chanchóm tễ ranáq tâng đõih nâi sâng. Ma máh cũai puai rangúh Raviei Yiang Sursĩ, alóit chanchóm tễ ranáq Yiang Sursĩ sâng. ⁶ Máh cũai táq ranáq puai sarnóm alóit yoc, kia tễ ranáq alóit táq la cuchĩt. Ma máh cũai táq ranáq puai Raviei Yiang Sursĩ, kia tễ ranáq alóit táq la bữn tamoong mantái cốp bữn ốt ien khẽ. ⁷ Khân hái puai rangúh hái bữm, la hái par-ũal cốp Yiang Sursĩ, yuaq hái tở ẽq puai phễp rit Yiang Sursĩ. Lứq pai hái yoc, la hái tở rơi puai phễp rit án. ⁸ Ngkíq, máh cũai puai rangúh alóit bữm, alóit tở têq táq yõn Yiang Sursĩ sâng bũi pahõm.

⁹ Ma anhia bữn Raviei Yiang Sursĩ ốt tâng mút pahõm anhia. Ngkíq anhia tở bữn puai noâng rangúh anhia bữm, ma anhia puai rangúh Raviei Yiang Sursĩ. Cũai aléq ma tở bữn bữn Raviei Crĩt ốt tâng mút án, cũai ki lứq tở bữn ốt muoi mút cốp Crĩt. ¹⁰ Tở hái cóq cuchĩt cõ tian ốc lôih. Ma khân Crĩt ốt tâng mút hái, ngkíq raviei hái ốt tamoong mantái níc, yuaq Yiang Sursĩ noap hái la cũai tanoang o. ¹¹ Yiang Sursĩ khoiq yõn Yê-su tamoong loah tễ cuchĩt. Ngkíq khân anhia

bữn Raviei Yiang Sursĩ ốt tâng mút anhia, nỡ-ra Yiang Sursĩ táq yỗn anhia tamoong loah tễ cuchĩt tê. Yiang Sursĩ táq ngkĩq la nhơ tễ Raviei án ốt cốp anhia.

¹² Ngkĩq, sễm ai ời, hái tỡ bữn tu noâng tễ ngê tiaq. Hái tỡ bữn puai noâng rangứh hái bữm. ¹³ Yuaq khân anhia puai rangứh anhia bữm, nỡ-ra anhia cuchĩt. Ma khân anhia tỡ bữn trĩh noâng rangứh anhia bữm cỗ nhơ Raviei Yiang Sursĩ ốt cốp anhia, nỡ-ra anhia lứq bữn tamoong. ¹⁴ Nheq tữh cũai ca puai rangứh Raviei Yiang Sursĩ, alới la con acái Yiang Sursĩ. ¹⁵ Toâq anhia bữn Raviei Yiang Sursĩ tâng mút anhia, anhia lứq cõt con acái Yiang Sursĩ; anhia tỡ bữn noâng ariang cũai sũl. Chơ anhia tỡ bữn ngcõh noâng samoât cũai sũl dốq ngcõh. Cỗ nhơ hái bữn Raviei Yiang Sursĩ, ngkĩq hái têq arô Yiang Sursĩ neq: “Mpoaq ời!”* ¹⁶ Raviei Yiang Sursĩ toâp chuai mút pahõm hái yỗn dáng samoât samõi hái la lứq con acái Yiang Sursĩ. ¹⁷ Khân hái lứq con acái Yiang Sursĩ, hái nguang bữn ndõm tê mun án parnõi cốp Crĩt. Cốp khân hái chĩuq túh coat parnõi cốp Crĩt, nỡ-ra hái bữn ốt ien khẻ cốp án tâng paloõng tê.

Máh Con Acái Yiang Sursĩ Acoan Ốc Tỡ Yũah Toâq

¹⁸ Cứq chanchóm neq: Tỡ bữn ntróu hái chĩuq ốc túh coat sanua, yuaq nỡ-ra hái bữn ốc o pha moâm. Tangái ki Yiang Sursĩ yỗn hái ốt cốp án,

* **8:15** 8:15 Tâng parnai Aram, Phau-lô dốq táq ntõng án dõq ‘mpoag’ la ‘aba’.

bữn chóc ang-ữr parnoi cốp án tê. ¹⁹ Yiang Sursĩ khoiƣ tễng túc culám khám ramứh tâng pưn cốp tâng pỡng. Dũ ramứh ốt ngỗh-rangỗh ngcuang tangái Yiang Sursĩ apáh nheq tửh con acái án. ²⁰ Nheq máh ramứh Yiang Sursĩ tễng la tở bữn o yũah, yuaq Yiang Sursĩ anoat máh ramứh ki cóq acoan ngcuang tangái ki tê. ²¹ Sanua máh ramứh nài cóq cuchĩt cốp abuoiq. Ma toâq tangái nheq con acái Yiang Sursĩ bữn chóc ang-ữr parnoi cốp án, dũ ramứh Yiang Sursĩ khoiƣ tễng lứq cõt o ễn, chơ tở bữn cuchĩt cốp abuoiq noâng. ²² Hái dáng chơ dũ ramứh tâng paloông cốp tâng cutễq ramóh ốc bap, tễ mbốq toau sanua. Ốc ki la samoat máh ramứh ki u-ổi túh coat ariang mansẽm đốq u-ổi toâq khuop cumo. ²³ Hái la u-ổi machớng ki tê, yuaq hái ễn áiƣ ngcuang tangái Yiang Sursĩ apáh hái lứq con acái án. Yiang Sursĩ khoiƣ yỗn Raviei án ốt tâng mút hái, yỗn hái dáng samoat lứq nữ-ra hái bữn tở tamái ễn. ²⁴ Bo Yiang Sursĩ chuai amoong hái, án ữq yỗn hái bữn tở tamái. Ngkíq hái ngcuang bữn ốc ki. Khân hái bữn chơ ốc hái ngcuang, hái tở bữn túh ngcuang noâng. Nốq hái noâng ngcuang ốc hái khoiƣ bữn chơ? ²⁵ Ma sanua hái tở yũah bữn ốc Yiang Sursĩ ữq yỗn hái. Ngkíq hái ốt tanhữ, cốp hái ngcuang nữ-ra hái lứq bữn ốc ki.

²⁶ Cốp Raviei Yiang Sursĩ yoc ễ chuai hái, yuaq hái la sacũl lứq, tở dáng nốq ễ câu sễq tễ Yiang Sursĩ. Toâq hái cuclốiq ma tở bữn luoh, lứq Raviei Yiang Sursĩ toâp đững santoiƣ hái câu ki atoâq pở Yiang Sursĩ. ²⁷ Yiang Sursĩ lứq dáng dũ

ốc tâng mút pahõm cũai. Cóp án dáng tê Raviei Yiang Sursĩ câu tang yõn cũai sa-âm. Raviei Yiang Sursĩ câu ngkíq, án puai samoât lứq ngê Yiang Sursĩ.

²⁸ Hái dáng chơ máh cũai Yiang Sursĩ arô yõn puai ngê án, la cũai ca ayooq lứq án, ốc ntróu toâq pở alóí, lứq Yiang Sursĩ táq yõn cõt o tẽ ốc ki. ²⁹ Tẽ dâu lứq Yiang Sursĩ khoiq dáng chơ hái, cóp án chanchóm ẽ táq yõn hái cõt samoât Con án tê. Ngkíq Yê-su Crít la con clúng Yiang Sursĩ, cóp hái ca toâq ntun, la máh a-ẽm Yê-su. ³⁰ Ngkíq Yiang Sursĩ arô hái, yuaq án khoiq chanchóm ẽ táq ranáq nâi tẽ dâu lứq chơ. Yuaq Yiang Sursĩ khoiq arô hái, ngkíq án táq yõn hái ớt tanoang o yáng moat án. Yuaq Yiang Sursĩ khoiq táq yõn hái ớt tanoang o yáng moat án, ngkíq án táq yõn hái bữn ớt manoi nứng án, cóp chõng chóc ang-ữr án tê.

Yiang Sursĩ Ayooq Lứq Hái

³¹ Nỏq hái ẽ pai tẽ ranáq nâi? Khân Yiang Sursĩ lứq chuai hái ngkíq, tở bữn noau têq táq ntróu chỏq hái. ³² Yiang Sursĩ khoiq yõn Con án cuchĩt tang hái. Khân án khoiq chuai hái ngkíq, hái dáng samoât lứq án chuai tê máh ramứh hái yoc ẽ bữn đõq têq táq ranáq án. ³³ Tở bữn ntróu noau cauq hái ca Yiang Sursĩ khoiq rườh, yuaq Yiang Sursĩ toâp noap hái tanoang o. ³⁴ Cóp tở bữn ntróu noau tẻq hái cõ tian lôih hái, yuaq Yê-su Crít toâp ớt coah atoam Yiang Sursĩ, cóp án rapai chuai hái chỏq Yiang Sursĩ. Yê-su Crít

khoiq cuchit tang hái, cốp án khoiq tamoong loah tẽ cuchit. ³⁵ Yê-su Crít ayooq lúq hái, cốp tở bữn muoi ốc ntróu têq cayoah hái tẽ ốc ayooq ki. Khân hái ramóh túh arúc, tở la túh cadit, tở la noau táq hái, tở la hái panhieih khlac, tở la ốq tampác tâc, tở la ramóh croốq, tở la noau tráh toâq dau, lúq samoât máh ramúh nâi tở têq táq yõn Yê-su Crít tở bữn ayooq hái. ³⁶ Machóng noau khoiq chĩc tâng tâm saráq Yiang Sursĩ tẽ mbốq neq:

“Cỗ tian hếq puai ngê anhia,

ngkĩq cu rangái noau chuaq ngê ẽ cachĩt hếq.

Noau nhêng chu hếq samoât noau nhêng chu charán cữu cheq ẽ cachĩt.”☆

³⁷ Ma tở bữn ntróu máh ốc túh coat nâi toâq pở hái, cỗ nhor án ca ayooq hái chuai hái yõn riap. ³⁸⁻³⁹ Cúq dáng samoât samoi tở bữn muoi ốc ntróu têq cayoah hái tẽ ốc ayooq Yiang Sursĩ. Khân toâq ốc cuchit, toâq ốc tamoong, toâq ranẽng Yiang Sursĩ tẽ paloong, toâq yiang canõh, toâq ranáq tâng dõi nâi tở la tâng dõi ntun, toâq cũi sốt, toâq ốc tẽ pởng tở la tẽ pũn, tở la toâq ramúh ntróu canõh ẽn, lúq ramúh aléq la tở têq táq yõn Yiang Sursĩ tở bữn ayooq hái. Án ayooq níc hái, yuaq hái ốt muoi mút cốp Yê-su Crít, Ncháu hái.

9

Phau-lô Ayooq Tốp I-sarel

¹ Cúq yoc anhia dáng muoi ramúh lúq p̄ieiq. Cúq la cũai sa-âm Crít, cóp Raviei Yiang Sursĩ dáng cúq atōng tanoang lúq. Cúq tở bữn cakéq ntróu. ² Cúq yoc anhia dáng neq: Cúq sâng ngua lúq, cóp ốc ngua nâi tở nai pút. ³ Hỡn tễ dũ ramúh canõh tâng dỡi tamoonq cúq, cúq yoc ốt muoi mút cóp Crít. Ma khân cúq cóq chĩuq ratáh tễ Crít, đọq chuai yỗn cũai I-sarel sa-âm án, cúq lúq sâng bũi ratáh toáp. Yuaq cúq ayooq sễm ai cúq, la cũai I-sarel, clũi tễ cúq ayooq tỗ cúq bữm. ⁴ Tỗp I-sarel la samoât con acái Yiang Sursĩ tẽ. Alóí khoiq hữm chớc Yiang Sursĩ chớ. Yiang Sursĩ khoiq yỗn alóí kĩaq parnai án cóp phễp rit án. Alóí sang Yiang Sursĩ khoiq dũn lúq chớ. Cóp Yiang Sursĩ khoiq par-ữq cóp alóí. ⁵ Alóí la muoi tống toi q cóp A-praham, I-sac, cóp Yacóp. Bo Crít cõt cũai, án la tễ tỗp I-sarel tẽ. Án toáp sốt toâr clũi nheq tễ canõh. Án lĩ-ralĩ cóp Yiang Sursĩ. Cóq noau khễn án mantái níc. Amen.

Yiang Sursĩ Rượh Cũai

⁶ Cúq tở bữn pai máh parnai Yiang Sursĩ ữq tở bữn cõt kia ntróu. Ma lúq samoât tở bữn dũ náq tễ tỗp I-sarel cõt con acái Yiang Sursĩ. ⁷ Cóp Yiang Sursĩ tở bữn rượh dũ náq con A-praham ma đọq alóí la lúq tống toi q A-praham. Yiang Sursĩ khoiq atōng A-praham neq: “Nhớ tễ I-sac cúq táq yỗn mới bữn máh ốc cúq khoiq ữq cóp mới.”✧

⁸ Ốc nâi la neq: Máh cũai tễ con tống A-praham, tở cõn nheq tữh alóí la con acái Yiang

✧ 9:7 9:7 Saráq Tễ Dâu 21:12

Sursĩ rươh. Ma máh cũai Yiang Sursĩ khoiq par-ữq cớp alóí, ớng alóí ki toáp la lứq con acái Yiang Sursĩ. ⁹ Yuaq Yiang Sursĩ khoiq ữq cớp A-praham neq: “Noâng muoi cumo ễn cứq ễ toáp loah pữ mới. Tangái ki, Sara lacuoi mới lứq bữn muoi lám con samiang.”✧

¹⁰ Cớp cứq atớng muoi ramứh ễn tễ Rê-be-ca, lacuoi I-sac, achúc achiac hái. Từ Rê-be-ca ớt mumiaq, Yiang Sursĩ atớng án neq: “Toáp tangái mới sết con, mới lứq bữn bar lám con samiang.”

¹¹⁻¹² Cớp Yiang Sursĩ atớng án ễn neq: “Nữ-ra con ndĩ sớt hữn tễ con clúng.”✧

Yiang Sursĩ pai ngkíq tễ nhũang Rê-be-ca tở yũah sết con. Yiang Sursĩ tở bữn rươh cớ tễ ranáq o tở la ranáq sâuq alóí bar náq táq. Ma Yiang Sursĩ rươh puai ốc án khoiq chanchóm tễ nhũang. ¹³ Noau khoiq chĩc tễ bar náq con samiang Rê-be-ca tâng tâm saráq Yiang Sursĩ tễ mbốq neq:

“Cứq ayooq Yacốp, ma cứq kêt Ê-sau.”✧

¹⁴ Nốq hái yoc ễ pai tễ ốc ki? Hái ễ pai Yiang Sursĩ táq tở pñeiq tở? Lứq tở cớn ngkíq! ¹⁵ Yuaq Yiang Sursĩ khoiq atớng Mũi-se neq: “Tam cứq! Khân cứq sâng ayooq táq cũai aléq, ki cứq ayooq. Cớp khân cứq sâng sarũiq táq cũai aléq, ki cứq sarũiq.”✧

¹⁶ Ngkíq ốc ki tam Yiang Sursĩ. Khân án sâng ayooq táq, ki án ayooq. Cũai tở tềq chanchóm

✧ 9:9 9:9 Saráq Tễ Dâu 18:10 ✧ 9:11-12 9:11-12 Saráq Tễ Dâu 25:23 ✧ 9:13 9:13 Ma-laki 1:2-3 ✧ 9:15 9:15 Loỏh Tễ Ê-yip-tô 33:19

ntróu tở la táq ntróu ẽ bữn ớc ki. ¹⁷ Tâng tâm saráq Yiang Sursĩ tẽ mbốq noau khoiq chĩc la Yiang Sursĩ pai chóq puo cruang Ê-yip-tô neq:

“Cứq yỗn mới cõt sốt,

yuaq cứq ẽ apáh chóc cứq la toâr lứq.

Cóp cứq yoc dũ cruang tâng cốc cutẽq nâi dáng ramứh cứq.”[✧]

¹⁸ Ngkíq tam Yiang Sursĩ. Khân án sâng yoc, ki án ayooq táq cũai. Khân án sâng yoc ẽ táq yỗn mút alóí coang, ki án táq.

¹⁹ Cõh lơ anhia ẽ blóh cứq neq: “Khân ngkíq, nõq Yiang Sursĩ tẽq hái, pai hái bữn lôih? Yuaq hái tở rơi táq ớc sâuq ntróu khân Yiang Sursĩ tở bữn yỗn hái táq.”

²⁰ Ma cứq ta-õi loah anhia neq: “Ơ sễm ai ơi! Nõq anhia khốn pai ngkíq chóq Yiang Sursĩ? Adéh cutẽq tở tẽq suon cóp cũai mial án neq: ‘Nõq mới táq roáp cứq nneq?’ ”

²¹ Án ca mial bar bẽng adéh tẽ muoi cốc cutẽq, tẽq án mial muoi bẽng nêuq o, ma muoi bẽng ẽn o padam sâng. Tam mút án yoc.

²² Machóng ki tê, Yiang Sursĩ ndõm nheq tữh cũai. Án bữn mút cutâu lứq chóq cũai ca táq moang ranáq sâuq. Ngkíq, nõ-ra án pupút alóí ki. Ma Yiang Sursĩ yoc ẽ apáh chóc án tê. Ngkíq án ót dũn chóq cũai táq ranáq sâuq. ²³ Yiang Sursĩ táq ngkíq, yuaq án yoc apáh yỗn hái dáng án bữn chóc toâr lứq, cóp án ayooq táq hái sa-ữi lứq. Án rườh hái tẽ mbốq yỗn hái tẽq chống tê

✧ 9:17 9:17 Loõh Tẽ Ê-yip-tô 9:16

chóc ang-ừ án. ²⁴ Yuaq ngkíq Yiang Sursĩ arô hái, dếh cũai I-sarel cớp cũai tở cởn cũai I-sarel.
²⁵ Machớng ki tề Hô-sĩa khoi q chíc tể mbốq ốc Yiang Sursĩ atớng saccoi q neq:

“Tể nhũang cứq tở bữn đợq alóí la proai cứq,
 ma sanua cứq đợq alóí la proai cứq tề.

Bo nhũang cứq tở bữn ayooq alóí,

ma sanua cứq ayooq lứq alóí. ✧ ²⁶ Pờ ntốq Yiang Sursĩ khoi q pai chóc cũai ki neq:
 ‘Anhia tở cởn proai cứq,’ lứq ntốq ki toáp noau đợq cũai ki la con acái Yiang Sursĩ,
 án ca tamoong mantái.” ✧

²⁷ Cớp Ê-sai la cũai tang bớq Yiang Sursĩ, án pai tể tốp I-sarel neq:

“Tốp I-sarel la cứng lứq.

Alóí rứh rường cớt samoat chũah tâng tor đợq mut,
 ma Yiang Sursĩ chuai amoong bĩq náq sâng tể tốp alóí.

²⁸ Chái lứq Yiang Sursĩ táq moâm máh parnai án khoi q pai.

Án ể culáh cóng yỗn dữ náq cũai tâng cớc cutêq nái.” ✧

²⁹ Cớp Ê-sai khoi q pai tể nhũang neq:
 “Sanua hái noâng bĩq náq sâng.

Khân Yiang Sursĩ Sốt Toâr Lứq ma tở bữn yỗn hái bữn tống toi q,
 ki vil hái cớt pứt nheq, machớng vil Sadôm cớp vil Camô-rơ tề.” ✧

✧ 9:25 9:25 Hô-sĩa 2:23 ✧ 9:26 9:26 Hô-sĩa 1:10 ✧ 9:28 9:28 Ê-sai 10:22-23 ✧ 9:29 9:29 Ê-sai 1:9

Tổp I-sarel Tờ Ếq Sa-âm

³⁰ Khân ngkíq, nốq hái ể pai tể ốc nâi? Hái ể pai neq: Mách cũai tờ cởn tể tổp I-sarel, tờ bữn chuaq yoc ể ốt tanoang o yáng moat Yiang Sursĩ, ma lứq alóí bữn ốc ki, cở alóí sa-âm. ³¹ Ma máh cũai tể tổp I-sarel chanchóm alóí ốt tanoang o yáng moat Yiang Sursĩ cở alóí puai phễp rit Mòi-se. Ma alóí tờ bữn bữn ốc ki. ³² Yuaq nốq alóí tờ bữn bữn? Yuaq alóí tờ bữn sa-âm. Alóí chanchóm alóí cóq táq puai phễp rit sâng. Ngkíq Yê-su Crít cởt samoât tamáu tâng rana yỗn tổp I-sarel. Alóí tờ ểq sa-âm; ốc ki la samoât alóí tũl tamáu ki. ³³ Yiang Sursĩ khoiq pai chơ tâng tâm saráq án tể Yê-su Crít neq:

“Cứq yỗn manoaq ốt tâng vil Si-ôn.

 Ấn la samoât tamáu.

Cũai cudốh tamáu nâi,
 chơ alóí chanchũai.

 Alóí cudốh, chơ alóí dóm.

Ma cũai aléq sa-âm án,
 cũai ki tờ nai pút ốc nguang.”☆

10

Yiang Sursĩ Yoc Chuai Amoong Nheq Tữh Cũai

¹ Sễm ai ơi! Mứt cứq sâng yoc lứq Yiang Sursĩ chuai amoong nheq tữh tổp I-sarel, cớp cứq đốq câu ngkíq. ² Cứq hữm alóí ểr áiq yoc ể puai ngê Yiang Sursĩ, ma alóí tờ dáng táq nốq yỗn p̄ieiq. ³ Alóí tờ bữn dáng Yiang Sursĩ khoiq atống rana yỗn cũai tềq ốt tanoang o yáng moat án. Ma

☆ **9:33** 9:33 Ê-sai 8:14; 28:16

alói puai ngê alói bữm chuaq yoc ẽ bữn ốc ki. Alói tở ẽq puai rana Yiang Sursĩ khoiq atỡng cũai yõn têq ốt tanoang o yáng moat án. ⁴ Cũai aléq ma sa-âm Crĩt, cũai ki cõt tanoang o yáng moat Yiang Sursĩ. Ma cũai aléq ma trĩh phếp rit Mũi-se sâng, cũai ki tở bữn ốt tanoang o yáng moat Yiang Sursĩ.

⁵ Mũi-se khoiq atỡng chơ tẽ cũai yoc ốt tanoang o yáng moat Yiang Sursĩ, cõ nhơ alói trĩh phếp rit Yiang Sursĩ. Án atỡng tẽ alói neq: “Cũai aléq ma táq pĩeiq dũ ốc tẽ phếp rit Yiang Sursĩ,

cũai ki lứq bữn tamoong cõ nhơ tẽ ốc ki.”✧

⁶ Ma Yiang Sursĩ atỡng cũai ca sa-âm, têq án ốt tanoang o yáng moat Yiang Sursĩ, la neq: “Anhia chõi pai: ‘Noau rơi chõn chu paloõng, dõq pờq coaiq Crĩt sễng chuai hái?’ ⁷ Cớp anhia chõi pai: ‘Noau rơi sễng chu pữn pữ ntốq raviei cũai cuchĩt ốt, dõq sễng coaiq Crĩt tamoong loah tẽ cuchĩt?’ ”✧

⁸ Ma ntróu parnai Yiang Sursĩ pai tẽ ốc tanoang o nũi? Lứq án pai neq:

“Ốc ki tở bữn yơng tẽ anhia.

Têq anhia ngin na bõq

cớp sa-âm samoât samơi tâng mút anhia.”

Nũi la machớng santoiq hếq khoiq atỡng anhia chơ yõn anhia sa-âm Yê-su Crĩt. ⁹ Khãn bõq anhia ngin Yê-su la Ncháu anhia, cớp mút anhia sa-âm samoât samơi Yiang Sursĩ khoiq yõn Yê-su

tamoong loah tễ cuchĩt, ki lứq Yiang Sursĩ chuai amoong anhia. ¹⁰ Hái ốt tanoang o yáng moat Yiang Sursĩ, la cồ nhơ mút pahồm hái sa-âm án. Cóp Yiang Sursĩ chuai amoong hái, la cồ nhơ bỗq hái ngin pai Yê-su Crĩt la Ncháu hái. ¹¹ Tâng tâm saráq Yiang Sursĩ tễ mbỗq noau khoiq pai chơ neq:

“Cũai aléq ma sa-âm án,
cũai ki lứq tở nai pút ốc nguang.”✧

¹² Yáng moat Yiang Sursĩ tở bữn mpha ntróu cũai I-sarel cóp cũai tở cởn cũai I-sarel. Ngkíq Yê-su Crĩt, Ncháu hái, yỗn sa-ữi ốc bốn pữ dĩ náq cũai ca sễq tễ án. ¹³ Yuaq tâm saráq Yiang Sursĩ tễ mbỗq pai neq:

“Dũ náq cũai ca arô sễq nhơ ramứh Yiang Sursĩ,
án lứq chuai amoong alóit.”✧

¹⁴ Ma nốq tềq cũai câu sễq tễ án, khân alóit tở yũah sa-âm án? Cóp nốq tềq alóit sa-âm án, khân alóit tở yũah bữn sâng ntróu tễ án? Cóp nốq alóit tềq bữn sâng tễ án, khân tở bữn noau pữq atỡng alóit? ¹⁵ Cóp nốq cũai tềq pữq atỡng alóit, khân tở bữn noau chuai yỗn alóit pữq? Tâng tâm saráq Yiang Sursĩ tễ mbỗq noau khoiq pai neq:

“Nêuq o lứq ayững cũai dững parnai o yỗn cũai canõh dáng.”✧

¹⁶ Ma lứq tở bữn dĩ náq cũai yoc ễ tamứng parnai o tễ Yê-su Crĩt. Machớng Ê-sai khoiq pai tễ mbỗq neq:

✧ **10:11** 10:11 Ê-sai 28:16 ✧ **10:13** 10:13 Yô-el 2:32 ✧ **10:15**
10:15 Ê-sai 52:7

“Ncháu cứq ơi! Noau noâq sa-âm tễ parnai hếq atông?”[☆]

17 Ma khân cũai yoc ễ sa-âm, cóq alóí tamúng nhũang. Cóp parnai ca alóí cóq tamúng nhũang, la parnai o tễ Yê-su Crít.

18 Ma cứq ễ blóh anhia neq: Tốp I-sarel khoiq sâng parnai nâi ma tở yũah? Lứq alóí khoiq sâng chơ, yuaq tâm saráq Yiang Sursĩ atông tễ mbỏq pai neq:

“Khoiq noau atông chơ ngê ki chũop nheq tâng cốc cutêq nâi.

Lứq ngê ki pláh toâq pở dũ pứp paloông cutêq.”[☆]

19 Cứq ễ blóh anhia ễn neq: Nốq tốp I-sarel tở bữn dáng tở? Mũi-se khoiq atông máh Yiang Sursĩ pai tễ mbỏq neq:

“Cứq táq yỗn anhia sa-on cumíq tễ cũai tở cởn cũai I-sarel;

cứq táq yỗn anhia sâng ũan cở tễ cũai tở bữn dáng ntrứ.”[☆]

20 Cóp Ê-sai atông tang bởq Yiang Sursĩ clóq lứq neq:

“Alóí ca tở bữn chuaq cứq, ki alóí ramóh cứq.

Cóp alóí ca tở bữn sếq tễ cứq, cứq lứq yỗn alóí dáng ngê cứq.”[☆]

21 Cóp Yiang Sursĩ pai ễn tễ tốp I-sarel neq:

“Nheq muoi tangái cứq sacở atĩ ễ roap chỏm cũai nâi,

ma alóí tở bữn trỉh cứq,

[☆] 10:16 10:16 Ê-sai 53:1 [☆] 10:18 10:18 ũat Khển 19:4 [☆] 10:19 10:19 Patâp Loah 32:21 [☆] 10:20 10:20 Patâp Loah 32:21

cóp alóí chíl níc cúq.”☆

11

Yiang Sursĩ Noâng Chuai Amoong Cũai I-sarel

¹ Chơ cúq ẽ blóh anhia neq: Yiang Sursĩ khiq táh tốp I-sarel tở? Lúq tở bữn! Cúq nâi toáp la cũai I-sarel. Cúq la tể tống toiq A-praham tể. Cóp cúq la tể tốp Ben-yamin. ² Yiang Sursĩ khiq ruroh tốp I-sarel tể mbốq chơ. Toau sanua án tở bữn táh alóí. Anhia khiq dáng chơ máh parnai Yiang Sursĩ atống Ê-li, án táq ranáq Yiang Sursĩ tể mbốq. Ê-li cauq tốp I-sarel chóq Yiang Sursĩ, pai neq:

³ “Yiang Sursĩ oi! Alóí ki khiq cachĩt chơ máh cũai tang bởq anhia.

Cóp alóí talốh đếh prông sang anhia hỡ.

Ổng manoaq cúq toáp noâng bữn tamooong.

Cóp alóí chi-chuaq ẽ cachĩt đếh cúq hỡ.”☆

⁴ Ma ntróu Yiang Sursĩ ta-đi Ê-li? Yiang Sursĩ ta-đi án neq:

“Cúq noâng bữn tapul ngin náq cũai samiang tể tốp I-sarel ca sang cúq.

Lúq alóí tở bữn pruum sacốh racól sang yiang Ba-al.”☆

⁵ Sanua la machống ki tể. Noâng bĩq náq sâng cũai I-sarel ca Yiang Sursĩ khiq ruroh, yuaq án bữn mút pahốm ẽ chuai miat alóí. ⁶ Án ruroh alóí cở án ẽ chuai miat alóí, tở cởn cở alóí táq

☆ **10:21** 10:21 Ê-sai 65:2 ☆ **11:3** 11:3 Puo Muoi 19:18 ☆ **11:4** 11:4 Puo Muoi 19:18

ranáq o. Khân án ruroh alóí cồ alóí khoiá táq ranáq o, ngkíq ốc ki tở têq pai noâng án chuai miat. ⁷ Khân ngkíq, nốq hái ể pai? Hái ể pai neq: Nheq tữh cũai I-sarel yoc ể ốt tanoang o yáng moat Yiang Sursĩ. Ma bĩq lứq alóí ramóh ốc ki. Ổng alóí ca Yiang Sursĩ ruroh sâng bữn ốc ki. Ma alóí ca tở ểq sa-âm, mút alóí cốt coang lứq ển. ⁸ Tâm saráq Yiang Sursĩ pai neq:

“Toau sanua, Yiang Sursĩ táq yỗn mút alóí tở têq sapúh.

Alóí bữn moat, ma alóí tở bữn hữm.

Alóí bữn cutữr, ma alóí tở bữn sâng.”[✧]

⁹ Cúp Davĩt pai tể mbốq neq:

“Alóí nguaiq cha bũi níc.

Alóí tở bữn chanchóm croốq criat ntróu toáq pữ alóí.

Ngkíq Yiang Sursĩ ơi!

Cứq sểq anhia táq yỗn ốc alóí cha bũi cốt samoát acáp

tở la alieiq yỗn alóí ramóh túh coat sa-ữi.

¹⁰ Cứq sểq anhia táq yỗn moat alóí cốt sũt.

Cúp cứq sểq anhia táq yỗn cloong alóí cốt tacô, đốq alóí chĩuq a-ĩ níc.”[✧]

¹¹ Ngkíq cứq yoc ể blóh anhia neq: Cồ tốp I-sarel tở bữn sa-âm Yê-su sanua, ngkíq Yiang Sursĩ lứq táh thánq alóí ki tở? Lứq tở bữn! Cồ tốp I-sarel tở bữn sa-âm, ngkíq Yiang Sursĩ ma chuai amoong máh cũai tở cữn cũai I-sarel ển. Yiang Sursĩ táq ngkíq yỗn mút pahồm tốp I-sarel

✧ **11:8** 11:8 Patáp Loah 29:4; Ê-sai 29:10 ✧ **11:10** 11:10 ũat Khển 69:22-23

cốt sa-on cumíq yoc ẽ bữn machóng cũai ki tê.
¹² Cỗ tốp I-sarel tở ẽq trĩh Yiang Sursĩ, ngkíq máh cũai canõh ẽn bữn ốc bốn sa-ữi tẽ Yiang Sursĩ. Cỗ tốp I-sarel táq lôih, ngkíq Yiang Sursĩ chuai cũai tở cõn cũai I-sarel ẽn. Khân ngkíq, ki hõn tẽ ki ẽn nõ-ra Yiang Sursĩ chuai nheq tữh cũai toáq máh cũai I-sarel sa-âm Yê-su Crĩt tê.

Yiang Sursĩ Chuai Amoong Cũai Tở Cõn Cũai I-sarel

¹³ Sanua cứq yoc atõng anhia ca tở cõn cũai I-sarel. Yiang Sursĩ ớn cứq atõng parnai án yõn anhia bữn sâng tê. Ngkíq cứq táq ranáq nâi nheq rangứh rahõ cứq. ¹⁴ Cứq táq ngkíq, la cứq ẽq tốp I-sarel cốt sa-on cumíq tẽ anhia. Moac moai bữn muoi tốp tẽ alói sa-âm tê, chơ Yiang Sursĩ chuai amoong cũai ki tê. ¹⁵ Toáq Yiang Sursĩ táh cũai I-sarel ca tở bữn sa-âm, án ỉt anhia ca tở cõn cũai I-sarel ẽn cốt muoi mút cớp án. Ma nõ-ra Yiang Sursĩ arô loah máh cũai I-sarel. Chơ ntrớu cốt kia tẽ ốc ki? Kia tẽ ốc ki la cũai cuchĩt bữn tamoong loah.

¹⁶ Cứq sacâm neq: Khân ỉt muoi lám bẽng mi, chơ chiau sang muoi béq yõn Yiang Sursĩ, nheq máh bẽng ki cốt khong Yiang Sursĩ tê. Khân sang rêh aluang yõn Yiang Sursĩ, chơ nheq máh abẽng la cốt khong án tê. ¹⁷ Khân abẽng o-li-vê tâng nường ma noau cứl táh, chơ noau ỉt abẽng o-li-vê tẽ arũih ẽn chot pláih bân abẽng noau khoiq cứl ki. Tốp anhia ca tở cõn cũai I-sarel la samoát abẽng o-li-vê tẽ arũih. Ma sanua anhia bữn roap rêng cớp ốc tamoong tẽ cũai I-sarel.

18 Anhia chỗi chanchóm anhia o hỡn tễ tộp I-sarel. Khân anhia chanchóm ngkíq, cóq anhia dáng neq tê: Abễng tỡ bữn amoong rêh, ma rêh amoong abễng. 19 Cỡh lơ anhia ca tỡ cỡn cũai I-sarel yoc ễ pai neq: “Yiang Sursĩ cứl táh abễng tiaq tễ nỡm ki yuaq án ễ chot hếq ễn tâng nỡm ki.”

20 Lứq p̄ieiq anhia pai. Ma Yiang Sursĩ cứl táh alóí ki, cỗ alóí tỡ bữn sa-âm. Cóp án chot anhia tâng ki cỗ anhia sa-âm. Ngkíq anhia chỗi chanchóm anhia o hỡn tễ tộp I-sarel. Ma cóq anhia ngcõh Yiang Sursĩ. 21 Khân Yiang Sursĩ cứl táh abễng tiaq tễ nỡm ki cỗ alóí tỡ bữn sa-âm, lứq án táq machóng ki tê chóq anhia, khân anhia tỡ bữn sa-âm. 22 Ngkíq hái dáng Yiang Sursĩ sarũiq táq cũai, cóp án táq cũai. Án táq máh cũai tỡ bữn sa-âm. Ma án sarũiq táq anhia sa-ữi lứq, khân anhia táq pỡq níc tâng ốc sarũiq ki. Ma khân anhia tỡ bữn táq ngkíq, Yiang Sursĩ lứq cứl táh anhia machóng alóí ki tê. 23 Ma nỡ-ra khân tộp I-sarel sa-âm, Yiang Sursĩ chot loah alóí. Yiang Sursĩ têq chot loah alóí tâng ntốq án khoiq cứl tễ nhũang. 24 Anhia ca tỡ cỡn cũai I-sarel la samoât abễng tễ nỡm o-li-vê dát tâng aruih. Ma Yiang Sursĩ chot anhia tâng nỡm o-li-vê án chóh tâng nưong án asa. Tộp I-sarel la samoât abễng tiaq tễ nỡm o-li-vê Yiang Sursĩ chóh. Khân Yiang Sursĩ têq chot abễng tễ aruih, ki khẽ hỡn ễn Yiang Sursĩ chot loah abễng tiaq ki tâng nỡm tiaq.

Nỡ-ra Yiang Sursĩ Chuai Amoong Cũai I-sarel

25 Sễm ai ơi! Cựq yoc anhia dáng tễ ramứh cutooq nâi, đợq anhia tở bữn ốt pai anhia dáng hỡn tễ cũai canỗh. Bữn muoi tộp cũai I-sarel bữn mút pahỡm coang. Ma moâm án arô máh cũai tở cỡn cũai I-sarel ca án khoiq ruroh, ki án arô cũai I-sarel ễn. 26 Tữ tangái ki toâq, Yiang Sursĩ lứq chuai amoong nheq tữh tộp I-sarel. Tâng tâm saráq Yiang Sursĩ tễ mbốq khoiq pai neq:

“Án ca chuai amoong cũai ễ toâq tễ vil Si-ôn.

Án táq yỗn tống toiq Yacốp tở bữn táq lờih noâng.

27 Tữ cứq táh lờih alóí, lứq tangái ki cứq táq yỗn moâm nheq máh ốc cứq khoiq parkhán cớp alóí tễ mbốq.”✧

28 Cũai I-sarel sa-ữi náq tở ểq sa-âm parnai o tễ Yê-su Crít. Ngkíq alóí par-ũal chóq Yiang Sursĩ. Cỗ alóí táq ngkíq, sanua anhia ca tở cỡn cũai I-sarel bữn sa-âm Yê-su Crít tê. Ma tộp I-sarel la cũai ca Yiang Sursĩ khoiq ruroh tễ nhũang, ki Yiang Sursĩ noâng ayooq alóí, cỗ án khoiq par-ữq cớp achúc achiac alóí. 29 Yiang Sursĩ tở nai ralêq loah máh ốc án khoiq ữq chơ. Ốc ntróu án yỗn, án tở nai ít loah. Cớp cũai án khoiq ruroh, án tở nai táh. 30 Tễ nhũang anhia tở bữn trĩh Yiang Sursĩ. Ma sanua Yiang Sursĩ ayooq táq anhia pláih tộp I-sarel ca tở ểq trĩh án. 31 Sanua tộp I-sarel tở bữn trĩh Yiang Sursĩ, cớp alóí sâng ũan lứq Yiang Sursĩ chuai anhia. Ma nỡ-ra Yiang

✧ 11:27 11:27 Ê-sai 59:20-21; Ê-sai 27:9; Yê-ramia 31:33-34

Sursĩ lứq sarũiq táq alóí machóng án sarũiq táq anhia sanua tê. ³² Yiang Sursĩ khoiq yõn dũ náq cũai cõt samoât cũai tũ la cõ alóí tở bữn trĩh, đõq têq án apáh ốc án sarũiq táq chỏq dũ náq alóí.

Khễn Yiang Sursĩ

³³ Ô! Rangoaiq lứq Yiang Sursĩ! Án dáng dũ ramứh. Háí tở rơi noap máh ốc án dáng. Cóp háí tở têq dáng máh ranáq án yoc ẽ táq cóp máh sarnóm án chanchóm. ³⁴ Tâng tâm saráq Yiang Sursĩ tễ mbốq noau khoiq blóh neq:

“Bữn cũai aléq têq dáng sarnóm Yiang Sursĩ tở?

Tở la cũai aléq têq tũeih atõng Yiang Sursĩ?✧

³⁵ Tở bữn cũai aléq têq pai Yiang Sursĩ tu án muoi ramứh ntróu,

cõ án khoiq yõn Yiang Sursĩ tễ nhũang chơ.”

³⁶ Lứq Yiang Sursĩ toáp khoiq tễng túc culám khám ramứh tâng pụn cóp tâng põng. Dũ ramứh ki la khong án. Cóp án toáp sớt dũ ramứh án khoiq tễng. Cỏq háí khễn níc Yiang Sursĩ sớt dõí lơi cumo. Amen.

12

Ranáq Cũai Táq Tở Bữn Machóng

¹ Sễm ai ơi! Yuaq Yiang Sursĩ sarũiq táq anhia sa-ũĩ lứq, ngkíq cứq sễq anhia chiau tở anhia pở Yiang Sursĩ. Táq ngkíq, tở anhia la samoât charán noau kiac sang miar khong Yiang Sursĩ, ma nõng anhia tamoong. Lứq pñeíq anhia sang Yiang Sursĩ máh ki, cóp Yiang Sursĩ sâng bũ lứq

✧ 11:34 11:34 Ê-sai 40:13

anhia táq ngkíq. ² Anhia chỗi puai ngê tâng dôi nâi. Ma cóq anhia yỗn Yiang Sursĩ lêq mút cóp sarnóm anhia yỗn têq chanchóm ngê tamái ên. Táq ngkíq, anhia lứq dáng ranáq ntróu Yiang Sursĩ yoc anhia táq. Ranáq ki la o yỗn anhia, cóp o yỗn Yiang Sursĩ tê. Cóp ranáq ki la tở bữn lôih ntróu yỗn anhia táq.

³ Cúq sa-ỡn Yiang Sursĩ khoi q chuai miat yỗn cúq bữn atỡng anhia dũ náq neq: Anhia chỗi chanchóm luat ngư tễ ranáq Yiang Sursĩ yỗn anhia táq. Ma cóq anhia chanchóm yỗn p̄ieiq tễ ramứh ki, yuaq anhia dáng Yiang Sursĩ khoi q yỗn anhia táq ranáq ki puai ốc sa-âm án khoi q yỗn anhia. ⁴ Tở cũai cóq bữn sa-ỡi ramứh nốq têq cốt tở. Cóp dũ ramứh ki bữn miar ranáq táq. ⁵ Machớng ki tê, hái ca khoi q sa-âm Crít la cứng, ma hái cốt muoi tốp. Ngkíq sanua hái pruum manoaq chuai manoaq. ⁶ Nheq tữh hái bữn miar ranáq Yiang Sursĩ yỗn hái táq. Khân án yỗn cũai aléq atỡng tang parnai Yiang Sursĩ, cóq cũai ki atỡng parnai ki puai máh án sa-âm. ⁷ Cũai aléq ma Yiang Sursĩ yỗn táq ranáq rachuai tâng tốp sa-âm, cóq cũai ki táq ranáq ki. Cũai aléq ma Yiang Sursĩ yỗn táq ranáq atỡng cũai canốh, cóq cũai ki táq ranáq ki. ⁸ Cũai aléq ma Yiang Sursĩ yỗn atỡng catoaih yớu, cóq cũai ki táq ranáq ki. Cũai aléq ma Yiang Sursĩ yỗn táq ranáq rachuai yớu, cóq cũai ki rachuai nheq rangứh rahỡ. Cũai aléq ma Yiang Sursĩ yỗn cốt sốt tâng tốp sa-âm, cóq cũai ki cutóng táq ranáq sốt. Cóp cũai aléq

ma Yiang Sursĩ yõn bữn mút sâng sarũiq táq yóu, cóq cũai ki sâng bũi táq ranáq ki.

Ốc Patâp Yõn Tốp Sa-âm

⁹ Cóq anhia ayooq yóu lứq samoât; chõi ayooq ống bỗq sâng. Cóq cóq anhia viaq nheq máh ranáq sâuq, ma táq ống ranáq o sâng. ¹⁰ Cóq anhia manoaq ayooq manoaq samoât anhia la sêm ai. Cóq cóq anhia achõn yóu toâr hõn tễ anhia. ¹¹ Anhia chõi aloah táq ranáq máh Yiang Sursĩ yõn anhia táq. Ma cóq anhia táq ranáq ki nheq rangứh rahõ anhia. ¹² Cóq anhia sâng bũi o bo anhia õt nguang Yiang Sursĩ chuai anhia. Cóq cóq anhia tanhữ níc máh ốc túh coat toâq pữ anhia. Cóq anhia câu sễq níc tễ Yiang Sursĩ. ¹³ Khân bữn noau tễ tốp sa-âm ma túh cadĩt, cóq anhia chuai cũai ki. Cóq anhia táq poang moat múh chók cũai tamoi ca toâq pữ anhia. ¹⁴ Cóq anhia sễq Yiang Sursĩ táq o chók cũai ễ táq anhia. Anhia chõi pachó pasrĩh alói. ¹⁵ Khân bữn cũai ma ramóh ốc bũi, cóq anhia sâng bũi ỡn cóp alói tê. Khân bữn cũai ma ramóh túh coat, cóq anhia nhiam cóp alói tê. ¹⁶ Cóq nheq tữh anhia bữn muoi mút sâng. Anhia chõi achõn tỗ bữm. Ma cóq anhia õt ratoi cóp cũai cadĩt. Cóq chõi chanchóm anhia la rangoaiq clũi tễ cũai canõh.

¹⁷ Khân bữn cũai táq sâuq chók anhia, anhia chõi carláh đờq chók alói. Ma cóq anhia cutóng táq ranáq o níc, yõn nheq tữh cũai hữm anhia la cũai o. ¹⁸ Khân têq, cóq anhia cutóng nheq rangứh rahõ đờq têq anhia õt ien khẽ cóp đũ

nác cũai. ¹⁹ Sễm ai ơi! Cúq ayooq anhia sa-ữi lứq. Cúq patáp anhia neq: Chỗi carláh đờq chóc cũai canốh. Cóq anhia yỗn Yiang Sursĩ toáp táq alóit ca táq anhia. Tâng tâm saráq Yiang Sursĩ, án khoiq pai neq:

“Cúq toáp têq carláh đờq yỗn cũai.

Lứq samoát cúq culáh cóng yỗn đũ nác cũai, puai ranáq alóit táq.”*[☆]

²⁰ Ntốq canốh tâng tâm saráq Yiang Sursĩ án pai ễn neq:

“Khân cũai par-ũal anhia ma sâng panhieih, cóq anhia yỗn án cha.

Khân án sâng ễ khlac đờq, cóq anhia yỗn án nguaiq.

Anhia táq ngkíq, cũai ki lứq sâng casiet táq tễ án ễ táq anhia.”*[☆]

²¹ Chỗi yỗn ngê sâuq radững anhia táq ranáq tở o. Ma cóq anhia táq níc ranáq o. Ngkíq anhia riap chíl máh ngê sâuq.

13

Cũai Sa-âm Cóq Táq Nỏq Cóp Cũai Sốt?

¹ Cóq đũ nác anhia trỉh parnai máh cũai sốt anhia. Lứq Yiang Sursĩ toáp chóch cũai ki yỗn cõt sốt. Khân Yiang Sursĩ tở bữn rươh, cũai ki tở têq cõt cũai sốt. ² Ngkíq khân cũai aléq ma tở ễq trỉh cũai sốt, la samoát án tở ễq trỉh Yiang

☆ **12:19** 12:19 Patáp Loah 32:35 * **12:20** 12:20 Tâng rana nài án pai: ‘Khân anhia táq ngkíq, samoát anhia parốm đờq rahững ùih tâng plớ án.’ ☆ **12:20** 12:20 Pali Panha 25:21-22

Sursĩ tê. Cũai ki lứq ramóh sa-ữi ọc túh coat.
³ Yiang Sursĩ tở bữn chóh cũai sớt yỗn táq cũai táq ranáq o. Ma Yiang Sursĩ chóh cũai sớt yỗn manrap cũai táq ranáq sâuq. Khân anhia tở ểq cũai sớt manrap anhia, cóq anhia táq ranáq o. Ngkíq máh cũai sớt lứq ngin anhia la cũai o.
⁴ Cũai sớt táq ranáq yỗn Yiang Sursĩ, đởq cởt kia yỗn anhia. Ma khân anhia táq ranáq sâuq, anhia cóq ngcỏh cũai sớt anhia, yuaq alóit tẻq táq anhia. Yiang Sursĩ yỗn alóit bữn chóc manrap cũai táq ranáq sâuq. ⁵ Ngkíq cóq anhia trỉh máh cũai sớt, ma anhia chỏi trỉh alóit cở anhia ngcỏh noau manrap sâng, ma cóq anhia trỉh alóit cở anhia dáng ọc nâi la lứq o. ⁶ Machóng ki tê, cóq anhia muap cởng pở cũai sớt, yuaq alóit roap cởng nâi cở alóit táq ranáq Yiang Sursĩ. ⁷ Ngkíq, anhia cóq yỗn dũ náq bữn roap máh ramứh pẻiq alóit cóq roap. Khân pẻiq anhia yỗn práq thểq, ki anhia yỗn. Khân pẻiq anhia yỗn cởng noau chát, ki anhia yỗn cởng ki. Khân pẻiq anhia yám noap, ki anhia yám noap. Khân pẻiq anhia khẻn, ki anhia khẻn.

Ốc Toâr Clữi Nheq Tẻ Canỏh La Ayooq Yóu

⁸ Moâm anhia culáh nheq máh ramứh anhia tu, anhia noâng tu muoi ramứh. Ramứh ki la cóq anhia manoaq ayooq manoaq. Cũai alẻq ma ayooq yóu, cũai ki lứq táq puai samoát samởi pẻp rit Yiang Sursĩ yỗn na Mỏi-se. ⁹ Yiang Sursĩ patáp neq:

“Chỏi cooc lacuoi tở la cayac noau.

Chôi cachĩt cũai.

Chôi tutuoiq.

Chôi ham crơng noau.”✧

Mách ốc patâp nâi, cớp máh ốc canốh ca Yiang Sursĩ khoi q patâp, ki cớt muoi ốc sâng. Khân hái trĩh ốc patâp nâi samoât samoi, lứq hái trĩh dũ ốc patâp canốh tê. Ốc patâp toâr clữi nheq tễ canốh là neq: Cớq anhia ayooq yóu machống anhia ayooq tỗ anhia bữm. ¹⁰ Cũai aléq ma ayooq yóu samoât samoi, cũai ki tỡ nai táq sâuq chốq yóu. Ngkíq, khân hái ayooq yóu, hái lứq trĩh dũ ốc Yiang Sursĩ patâp.

¹¹ Cớq hái cutống táq ranáq ki, yuaq hái dáng cheq ẽ toâq tangái Yê-su yỗn hái loốh tễ cutểq nâi. Yuaq tangái ki khoi q cheq hỡn tễ tangái hái mbốiq sa-âm. Ngkíq, cớq hái chéng-cachéng ốt ngcuang tangái ki. ¹² Chôi táq noâng ranáq tâng đỏi nâi. Ranáq ki la samoât noau táq tâng sadâu. Ma sanua cheq ẽ toâq tangái Yê-su toâq loah pỡ cutểq nâi. Nâi la samoât riang cheq ẽ poang tarựp. Ngkíq, cớq hái táh nheq máh ranáq noau đốq táq tâng canám. Hái táq máh ranáq Yiang Sursĩ yỗn hái táq sâng. Ranáq ki la samoât ranáq noau đốq táq tâng poang. ¹³ Dũ ranáq hái táq, cớq hái táq o ariang cũai táq ranáq tâng poang. Táq ngkíq, hái tỡ bữn ngcốh ntrứu cũai canốh hữm máh ranáq hái táq. Anhia chôi cha tơn-tín. Chôi bũl blống. Chôi bẻq parnoi khân tỡ bữn lacuoi cayac. Chôi táq pampla. Chôi ralốih.

✧ 13:9 13:9 Loốh Tễ Ê-yip-tô 20:13-17; Patâp Loah 5:17-21

Cóp chỗi sa-on cumíq. ¹⁴ Ma cóq anhia sêq Yê-su Crít, Ncháu anhia, kĩaq mút pahõm anhia. Cóp anhia chỗi chanchóm noâng ẽ puai ngê sãuq ariang mút pahõm anhia yoc.

14

Manoaq Chỗi Têq Manoaq

¹ Khân bữn cũai aléq khoiá sa-âm Yê-su chơ, ma án tở yũah dáng sa-ũi tể ngê ki, cóq anhia roap cũai ki bũi o. Cóp anhia chỗi rasuon cóp án tể máh ramứh án tở yũah dáng raloaih. ² Bữn cũai tể tốp hái, alói chanchóm alói têq cha dũ ramứh cớng sana, tở bữn lôih ntróu. Ma bữn máh cũai tở yũah dáng raloaih, alói chanchóm tở bữn o cha sãiq. ³ Alói ca cha dũ ramứh cớng sana tở têq mumat alói ca tở bữn cha sãiq. Cóp alói ca tở bữn cha sãiq tở têq pai cũai cha dũ ramứh sana bữn lôih. Manoaq tở têq tểq manoaq, yuaq Yiang Sursĩ khoiá noap cũai ki la con acái án. ⁴ Nỗq anhia clốq lứq tểq cũai táq ranáq yõn ncháu canõh? Lứq ống ncháu án toáp têq tểq án táq ranáq o, tở la tở o. Cóp Yiang Sursĩ bữn chóc têq chuai cũai ki yõn táq ranáq o.

⁵ Bữn cũai chanchóm cóq đốq miar máh tangái noau cóq puai rit sang Yiang Sursĩ. Ma bữn cũai canõh chanchóm cu rangái la machống nheq. Cóp dũ náq tutuaiq yõn samoât, ntróu Yiang Sursĩ ẽq án táq tể ốc nãi. ⁶ Án ca đốq miar muoi tangái yõn puai rit sang Yiang Sursĩ, án táq cổ án yám noap Yiang Sursĩ. Cóp án ca cha dũ ramứh cớng sana, án táq ngkíq la án yám noap Yiang

Sursĩ tê, yuaq án sa-õn Yiang Sursĩ yõn công sana ki. Machóng ki tê, án ca tở bữn cha dữ ramúh công sana, án táq ngkíq la án yám noap Yiang Sursĩ tê. Cóp án sa-õn Yiang Sursĩ tê án bữn công sana cha. ⁷ Tở bữn ổng tamoong yõn cutõ án bữm, cóp tở bữn cuchĩt yõn cutõ án bữm. ⁸ Khân hái tamoong, la hái tamoong yõn Yiang Sursĩ. Cóp khân hái cuchĩt, hái cuchĩt yõn Yiang Sursĩ. Ngkíq khân hái tamoong tở la cuchĩt, hái táq ranáq yõn Yiang Sursĩ. ⁹ Yuaq ngkíq, Crít khoiq cuchĩt cóp án tamoong loah tễ cuchĩt, đõq tẽq án cõt Ncháu máh cũai ca noâng tamoong cóp máh cũai ca khoiq cuchĩt. ¹⁰ Ngkíq, nõq anhia ma ẽ tẽq sễm ai anhia? Cóp nõq anhia mumat sễm ai anhia? Nỡ-ra nheq tữh hái cóq tayững yáng moat Yiang Sursĩ đõq án rablớh hái. ¹¹ Yuaq noau chĩc chơ tâng tâm saráq Yiang Sursĩ tễ mbốq neq:

“Yiang Sursĩ khoiq pai neq: ‘Lứq samoát cứq tamoong mantái níc.

Ngkíq nõ-ra dữ náq cũai toâq sacốh racól choâng moat cứq.

Cóp dữ náq cũai lứq ngin cứq toâp la Yiang Sursĩ.’”[✧]

¹² Ngkíq nõ-ra nheq tữh hái cóq ngin yáng moat Yiang Sursĩ máh ranáq hái táq tâng đõi nái.

Chõĩ Paryõng Yóu Táq Lôih

¹³ Yuaq ngkíq, hái manoaq chõĩ tẽq noâng manoaq. Ma cóq hái chanchóm neq: Hái chõĩ táq yõn sễm ai cõt pẽ pahõm tở la táh chíq ngẽ

[✧] 14:11 14:11 Ê-sai 45:23

Yiang Sursĩ. ¹⁴ Cỗ cứq ốt muoi mút cốp Yê-su, Ncháu hái, ngkíq cứq dáng samoât samoi dĩ ramúh cớng sana tở bữn lờih ntróu yỗn cũai cha. Ma khân bữn cũai canốh chanchóm bữn cớng sana Yiang Sursĩ tở ểq án cha, ngkíq cớng sana ki la lờih yỗn án cha. ¹⁵ Khân anhia cha muoi ramúh ntróu, ma sểm ai anhia chanchóm lờih cha ramúh ki, sểm ai ki lứq sâng ngua toaq alóí hữm anhia cha ramúh ki. Anhia táq ngkíq, la samoât anhia tở bữn ayooq sểm ai anhia. Anhia chỏi yỗn cớng sana anhia cha ma táq yỗn sểm ai anhia táh chíq ngê Yiang Sursĩ, yuaq Crít khoiq cuchít tang cũai ki tê. ¹⁶ Khân anhia ể táq ranáq ca anhia chanchóm o, ma sểm ai anhia pai ranáq ki lờih, ki o anhia chỏi táq. ¹⁷ Yiang Sursĩ tở bữn yỗn cũai mut tâng tốp án sốt la cỗ tể cớng alóí cha tở la nguaiq. Ốc ki la tở bữn toâr ntróu. Ma Yiang Sursĩ yỗn máh cũai mut tâng tốp án sốt cỗ alóí bữn mút tanoang o, alóí ốt ien khể cốp yóu, cốp alóí ốt bũi níc cỗ nhơ Raviei Yiang Sursĩ ốt tâng mút pahóm alóí. ¹⁸ Cũai aléq ma táq ranáq Crít ngkíq, Yiang Sursĩ lứq sâng bũi cốp án, cốp cũai canốh hữm án la cũai o tê. ¹⁹ Ngkíq, cóq hái cutóng ốt ratoí cốp yóu, cốp cóq hái manoaq chuai manoaq yỗn bữn óc sa-âm pacái lứq ển.

²⁰ Dĩ ramúh cớng sana la o yỗn cũai cha. Ma khân sểm ai anhia hữm anhia cha cớng sana ca án chanchóm Yiang Sursĩ tở ểq án cha, cõh lơ án cha tê cớng sana ki. Chơ án táq ranáq ca án chanchóm lờih khân án táq, cốp án nguai

chíq tẽ ngê Yiang Sursĩ. Khân ngkíq, la samoât anhia talõh ranáq Yiang Sursĩ cõ tian sana anhia cha. ²¹ O hõn anhia chõi cha sâiq, chõi nguaiq blõng, chõi táq ranáq canõh, khân ranáq ki táq yõn sêm ai anhia táq lôih cõp tỡ ẽq sa-âm noâng. ²² Khân anhia chanchóm ranáq anhia táq tỡ bữn lôih ntróu, ki o anhia đõq ọc ki tâng mút pahõm anhia, yuaq Yiang Sursĩ dáng mút pahõm anhia. Bõn lứq cũai táq ranáq ma mút pahõm án tỡ bữn tanĩq án táq lôih. ²³ Ma khân cũai aléq chanchóm án bữn lôih khân án cha muoi ramứh cớng sana ntróu, ma noâng án cha clốq, ki án táq lôih, yuaq án tỡ bữn táq ranáq ki cõ yoc ẽ trĩh Yiang Sursĩ. Dũ ranáq cũai táq, khân alóit tỡ bữn táq cõ yoc ẽ trĩh Yiang Sursĩ, ranáq ki lứq lôih.

15

Cũai Aléq Ca Sa-âm Pacái Cóg Chuai Yóu Canõh

¹ Hái sa-âm pacái chơ, cóq hái rachuai yóu ca tỡ yũah sa-âm pacái. Hái chõi táq yõn pñeiq pahõm hái bữm. ² Ma dũ náq hái cóq táq o yõn cũai canõh têq sa-âm pacái lứq ẽn. ³ Táq ngkíq hái tũoiq Crĩt, yuaq án tỡ bữn táq yõn bũi pahõm án bữm. Tâng tâm saráq Yiang Sursĩ tẽ mbốq noau khoiq chĩc saccoaiq tẽ santoiq Yê-su pai chóq Yiang Sursĩ neq:

“Santoiq noau ayê ra-ac anhia, sanua toâq pỡ cứq ẽn.”✧

4 Mách santoiq noau khoiq chĩc tâng tâm saráq Yiang Sursĩ tẽ mbốq, noau chĩc đốq atống hái. Ngkíq, tềq hái ốt ngcuang máh ramứh o Yiang Sursĩ ẽ táq yỗn hái, cỗ parnai Yiang Sursĩ aliam hái cớp chuai hái yỗn rơi tanhĩr. 5 Cứq sếq Yiang Sursĩ, án ca táq yỗn anhia tềq tanhĩr, cớp án ca aliam níc anhia, táq yỗn anhia cốt muoi mút muoi pahồm puai Yê-su Crĩt. 6 Khãn anhia táq ngkíq, anhia bữn muoi mút muoi parnai khễn Yiang Sursĩ, la Mpoaq Yê-su Crĩt, Ncháu hái. 7 Ngkíq, cóq anhia manoaq táq o chốq manoaq samoât Crĩt khoiq táq o chốq anhia chơ, đốq máh cũai bữn khễn Yiang Sursĩ cỗ tẽ ranáq anhia táq. 8 Cứq atống anhia dáng neq: Crĩt táq ranáq rachuai tốp I-sarel, yỗn alóí tềq dáng parnai Yiang Sursĩ la lứq p̄ieiq, yuaq Yiang Sursĩ khoiq táq máh ốc án khoiq ữq cớp achúc achiac alóí tẽ mbốq. 9 Cớp Yê-su táq yỗn cũai tỡ cỡn cũai I-sarel tềq khễn Yiang Sursĩ tê, yuaq Yiang Sursĩ sâng ayooq táq alóí. Noau khoiq chĩc saccoaiq tẽ Yê-su tâng tâm saráq Yiang Sursĩ tẽ mbốq neq: “Lứq cứq khễn anhia yáng moat cũai tỡ cỡn cũai I-sarel.

Cớp cứq ữat khễn ramứh anhia.”✧

10 Tâng ntốq canốh tâng tâm saráq Yiang Sursĩ noau khoiq chĩc neq:

“Mách anhia tỡ cỡn cũai I-sarel ợ!

Cóq anhia ốt bũi óh parnơi cớp tốp ca Yiang Sursĩ rườh!”✧

11 Cớp bữn ntốq canốh ễn noau khoiq chĩc neq:

✧ 15:9 15:9 Samu-ẽl Bar 22:50; Ữat Khễn 18:49 ✧ 15:10 15:10 Patáp Loah 32:43

“Nheq tữh anhia ca tữ cữn cũai I-sarel!

Cóq anhia khễn Yiang Sursĩ!

Dũ tộp cũai cóq khễn níc án!”✧

¹² Bữn muoi ntốq canõh ễn tâng tâm saráq Yiang Sursĩ, Ê-sai khoiq chĩc neq:

“Tễ tống toiq Yê-sai bữn muoi lám con samiang.*

Án cõt sốt cũai tữ cữn cũai I-sarel,

cóp alóı ngcuang án chuai amoong alóı.”✧

¹³ Cúq sễq Yiang Sursĩ, án ca nỡm ốc ngcuang, chuai anhia yõn ốt bũi óh níc cũ nhơ anhia sa-âm. Cóp cúq sễq án yõn Raviei án chuai anhia bữn mút pahõm ngcuang níc.

Ranáq Phau-lô Táq

¹⁴ Sễm ai ơi! Cúq dáng anhia la cũai patoat o cóp dáng sa-ữi lứq. Ngkíq anhia têq manoaq catoaih atõng manoaq. ¹⁵ Ma cúq tữ bữn ngcõh ntróu chĩc choáiq thờ đốq catoaih atõng anhia. Cúq tữ bữn ngcõh, yuaq Yiang Sursĩ khoiq rườh cúq yõn táq ranáq nâi. ¹⁶ Yiang Sursĩ yõn cúq cõt ayũng atĩ Yê-su Crĩt, đốq atõng cũai tữ cữn cũai I-sarel máh parnai o tễ Yiang Sursĩ. Cúq yoc ễ chiau alóı pữ Yiang Sursĩ cõt samoat crong noau chiau sang, ễq Yiang Sursĩ sâng bũi pahõm. Raviei Yiang Sursĩ toáp táq yõn alóı cõt cũai miar đốq táq ranáq Yiang Sursĩ. ¹⁷ Yuaq cúq bữn muoi mút cóp Yê-su Crĩt, ngkíq cúq sâng bũi pahõm táq máh ranáq Yiang Sursĩ yõn cúq táq. ¹⁸ Cúq tữ têq pai ntróu tễ ranáq Yiang Sursĩ yõn cũai

✧ **15:11** 15:11 Ũat Khễn 117:1 * **15:12** 15:12 Yê-sai la mpoaq Puo Davĩt. ✧ **15:12** 15:12 Ê-sai 11:10

canõh táq. Ma têq cúq ưo tẽ ranáq Crĩt chuai cúq táq. Ranáq nâi la neq: Yiang Sursĩ yõn cũai tở cõn cũai I-sarel sa-âm tê, cõ alóit tamúng santonq cúq atõng, cõ alóit hũm ranáq cúq táq, ¹⁹ cớp cõ Raviei Yiang Sursĩ yõn cúq bũn chóc táq ranáq salẽh cớp táq tếc canõh yõn cũai hũm. Ngkíq cúq khiq atõng parnai o tẽ Crĩt tâng dũ ntốq tẽ vil Yaru-salem toau toâq pở cruang I-luri-cum. ²⁰ Cúq táq ngkíq cõ cúq yoc lứq atõng parnai o tẽ Yê-su Crĩt yõn alóit ca tở yũah sâng ntróu tẽ án. Cúq tở ẽq pởq atõng pở ntốq khiq bũn cũai pởq atõng chơ. Khân cúq táq ngkíq, la samoât cúq táq đống tâng tanang cũai canõh khiq thũan chơ. ²¹ Noau khiq chĩc tâng tâm saráq Yiang Sursĩ tẽ mbốq neq:

“Máh cũai tở yũah sâng parnai o tẽ Yiang Sursĩ,
nữ-ra alóit bũn sâng tê.
Cớp alóit ca tở yũah dáng tẽ án,
nữ-ra alóit bũn dáng tê.”✧

Ranáq Phau-lô Yoc Ẽ Táq Nữ-ra

²² Cõ cúq miaq táq ranáq ki, yuaq ngkíq cúq tở yũah toâq sa-óh anhia. Ma khiq sa-ũri trỗ chơ cúq yoc ẽ toâq pở anhia. ²³ Tẽ dũn lứq chơ cúq ẽr áiq yoc ẽ toâq pở anhia, cớp sanua cúq táq moâm chơ ranáq cúq tâng cruang nâi. ²⁴ Toâq cúq bũn pởq pở cruang Sapên, cúq ẽ mut sa-óh tâng vil anhia voai. Cúq yoc lứq ramóh anhia. Toâq moâm cúq sa-óh anhia, cúq sễq anhia chuai yõn cúq pởq pở cruang Sapên.

✧ 15:21 15:21 Ê-sai 52:15

25 Ma sanua cúq pǝq pǝ vil Yaru-salem yoc ẽ chuai máh tǝp sa-âm ǝt tâng vil ki. 26 Máh cũai sa-âm tâng cruang Ma-sadôn cǝp cruang Achai, alóí bũ pahǝm parǝm práq dǝq chuai máh cũai sa-âm tâng vil Yaru-salem ca túh cadĩt lúq. 27 Máh cũai tâng cruang Ma-sadôn cǝp cruang Achai, alóí tǝ cǝn cũai I-sarel. Ma alóí bũ pahǝm yoc ẽ chuai máh cũai sa-âm tâng tǝp I-sarel. Alóí tu tǝp I-sarel tẽ, yuaq tẽ nhũang cũai I-sarel khoiq chuai yǝn alóí bũn dáng parnai o tẽ Yiang Sursĩ. Ngkíq, o yǝn alóí chuai crǝng yǝn cũai I-sarel ca túh cadĩt. 28 Tũ moâm cúq chiau crǝng yǝn cũai sa-âm ǝt tâng vil Yaru-salem, chǝ cúq ẽ pǝq pǝ cruang Sapên ẽn. Ma cúq ẽ mut sa-óh anhia tâng vil Rô-ma bo cúq pǝq pǝ ki. 29 Cúq dáng, tũ cúq toâq pǝ anhia, cúq dũng ǝc bốn puan tẽ Crĩt yǝn anhia.

30 Cũ anhia ǝt muoi mút cǝp Yê-su Crĩt, Ncháu hái, cǝp cũ Raviei Yiang Sursĩ chuai anhia manoaq ayooq manoaq, ngkíq cúq sǝq anhia pruaam câu yǝn cúq. Cǝp yǝn hái câu sǝq tẽ Yiang Sursĩ nheq rangúh rahǝ hái. 31 Cúq sǝq anhia câu yǝn cúq tẽq vót tẽ atĩ alóí tǝ bũn sa-âm Yê-su tâng cruang Yudê. Cǝp sǝq anhia câu chuai cúq tẽ máh ranáq cúq ẽ táq dǝq chuai alóí ca sa-âm tâng vil Yaru-salem, yǝn alóí bũ pahǝm roap crǝng ki. 32 Moâm ki, khân Yiang Sursĩ yǝn, cúq toâq pǝ anhia bũn mút pahǝm bũ óh lúq. Chǝ hái pruaam ǝt sar-óh bũ ǝn. 33 Cúq sǝq Yiang Sursĩ, án ca yǝn hái ǝt ien khẽ, ǝt níc cǝp anhia.

Amen.

16

Phau-lô Blóh Cahan Yóu

¹ Cúq sêq anhia roap tabõp tabéh o sêm õi hái, ramúh Phê-bê. Án táq ranáq Yiang Sursĩ tâng tốp sa-âm tâng vil Sen-cơ. ² Sêq anhia roap chõm án ariang Ncháu yoc hái roap dũ náq cũai ca khoiq sa-âm án. Cúq sêq anhia chuai mansêm nâi ntróu án sêq tễ anhia, yuaq án khoiq chuai sa-ũi cũai, dếh cúq hỡ.

³ Cúq yoc ẽ cahan Aki-la cốp lacuoi án, Barit-sin. Alóí bar náq ki táq ranáq Yê-su Crít parnoi cốp cúq. ⁴ Alóí bar náq ki pruam muoi mút cuchĩt tỡ la tamoong, la alóí tỡ bữn táh cúq. Ngkíq cúq sa-õn alóí. Cốp dũ tốp sa-âm ca tỡ cõn tễ tốp I-sarel, ki sa-õn alóí tê. ⁵ Cúq ẽ cahan tê tốp sa-âm ca đốq rôm tâng đống alóí bar náq ki.

Cúq cõiq parnai sa-óh yóu cúq, Ê-panê. Tễ dâu lứq manoaq án toáp sa-âm Crít tâng cruang Asia. ⁶ Cúq ẽ cahan Mari, án ca cutóng lứq táq ranáq yõn anhia. ⁷ Cúq ẽ cahan Antrô-nic cốp Yunia. Alóí bar náq nâi la muoi tốp cốp cúq. Cốp alóí õt tũ parnoi cốp cúq tê. Máh cũai atõng parnai o tễ Yê-su Crít, alóí yám noap lứq bar náq nâi. Cốp bar náq nâi sa-âm Crít nhũang cúq. ⁸ Cúq ẽ cahan Amplia tê. Án la yóu cúq samoât lứq, yuaq hếq sa-âm Ncháu parnoi. ⁹ Cúq ẽ cahan Ur-ban, án ca táq ranáq Crít parnoi cốp cúq. Cốp cúq ẽ cahan yóu cúq, Sa-tachi. ¹⁰ Cúq

ẽ cahan Apel tê. Án khoiq apáh án lứq bữn muoi mút cốp Crít. Cốp cứq ẽ cahan dĩ náq cũai tâng đống sũ Ari-tabul. ¹¹ Cứq ẽ cahan Hê-rô-dien, án ca muoi tốp cốp cứq. Cốp cứq ẽ cahan dĩ náq cũai tâng đống sũ Narsit ca khoiq sa-âm Yê-su.

¹² Cứq cớq parnai sa-óh bar náq sểm ỡi Tri-phan cốp Tri-phôt. Alói ki táq ranáq Ncháu tê. Cốp cứq cớq santoiq sa-óh sểm ỡi cứq, Parsit. Án ki sarâng lứq táq ranáq Ncháu. ¹³ Cứq ẽ cahan Ruphu, cốp mpiq án. Ruphu la cũai sa-âm Ncháu pacái lứq, cốp mpiq án la samoât riang mpiq cứq tê. ¹⁴ Cứq cớq parnai sa-óh Asun-crit, Plê-côn, Her-mêt, Pa-truba, Her-mat, cốp máh sểm ai canõh ca ốt cốp alói. ¹⁵ Cứq ẽ cahan tê Phalô-lacô, Yuli, Narê cốp amuaq án, Ô-lumpa, cốp dĩ náq cũai sa-âm ca ốt parnoi cốp alói.

¹⁶ Sểq anhia manoaq cubán o chóq manoaq. Ngkíq noau dáng anhia manoaq ayooq manoaq. Nheq máh tốp sa-âm Crít ốt nnâi, alói blóh cahan anhia tê.

Anhia Chối Tamứng Parnai Noau Sũ

¹⁷ Sểm ai ỡi! Cứq yoc ẽ patâp anhia, cớq anhia nhêng yõn samoât! Bữn cũai yoc ẽ carchúc ẽq anhia ralõih. Cốp alói ẽ radững anhia táq ranáq sâuq. Ranáq alói táq mpha tể noau khoiq atõng anhia tể ngê Yiang Sursĩ. Ngkíq o yõn anhia viaq chíq tể alói. ¹⁸ Yuaq cũai ki puai rangứh alói bữm. Alói tở ẽq táq ranáq Crít, Ncháu hái. Alói yoc ẽ raphêq cũai noâng sacũl. Alói khên anhia cốp táq ntõng santoiq ẽm o lứq chóq anhia. Ma

santoiq alóí tở bữn lứq ntróu. ¹⁹ Dữ cruang khoiq sâng chơ anhia lứq trĩh parnai Yiang Sursĩ. Ngkiq cứq sâng bũi lứq. Cứq ẽq anhia cõt roan rangoaiq đõq táq ranáq o, ma anhia chõĩ roan rangoaiq đõq táq ranáq sâuq. ²⁰ Lứq Yiang Sursĩ toáp yõn hái õt ien khẽ. Tở bữn dũn noâng án lứq chuai anhia chĩl riap yiang Satan. Cứq sễq Yê-su, Ncháu hái, chuai níc anhia.

Yõu Phau-lô Cahan Sa-óh

²¹ Ti-muthê, án ca táq ranáq Yiang Sursĩ parnoi cốp cứq, án coiq parnai sa-óh anhia. Lusit, Yasôn, cốp Susi-pathơ, alóí cahan anhia tê. Alóí la muoi sâu cốp cứq. ²² Cứq la ramứh Têr-tiu chĩc choaiq thữ nãi chuai Phau-lô. Cứq yoc ẽ cahan nheq tữh anhia tê, yuaq hái bữn muoi mứt cốp Yê-su Crĩt, Ncháu hái.

²³ Cai-ut coiq parnai cahan anhia tê. Án sâng bũi pahõm chũm siem cứq tâng đõng án. Cốp án sễq cũai sa-âm pỡq rôm pỡ đõng án. Ê-rat ẽ cahan anhia tê. Án la cũai yõng práq tâng vil Cờ-ntô. Cuạ-tu ẽ cahan anhia tê. Án la sễm ai hái. ²⁴ Cứq sễq Yê-su Crĩt, Ncháu hái, chuai miat anhia. Amen.*

Khẽn Yiang Sursĩ

²⁵ Cóp hái khẽn Yiang Sursĩ, án ca têq táq yõn mứt pahõm anhia sa-âm pacái lứq parnai o tễ Yê-su Crĩt, ariang cứq khoiq atõng anhia chơ. Yiang Sursĩ khoiq apáh chơ parnai nãi yõn hái dáng. Tễ tangái Yiang Sursĩ tễng paloõng cutễq,

* **16:24** 16:24 Sa-ữi tâm saráq tiaq tở bữn bữn rana 24 nãi.

án cutooq parnai nâi, ²⁶ ma án yõn cũai tang bõq án chĩc saccoaiq đõq tẽ sãntoaiq nâi. Chơ sanua án yõn nheq tũh cũai dáng. Yiang Sursĩ la Yiang tamooong mantái níc. Án toáp ớn cóq atõng yõn đũ cruang dáng tê parnai nâi, đõq nheq tũh cũai têq sa-âm cóp trĩh parnai nâi. ²⁷ Hái cóq khẽn Yiang Sursĩ cũ nhơ tẽ Yê-su Crĩt. Ống án toáp dáng đũ ramứh. Cóq hái khẽn níc án sốt đõi lơi cumo. Amen.

**Parnai Yiang Sursĩ - Kinh Thánh tiếng Bru
Bru, Eastern: Parnai Yiang Sursĩ - Kinh Thánh tiếng
Bru Bible**

copyright © 2015 Wycliffe Bible Translators, Inc.

Language: Eastern Bru

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source
files dated 29 Jan 2022

2f74bcbe-d4f1-5386-8c30-29d0147bb706